

鄉賢四

邑人張森楷學



苟雲龍字乘萬州西里白沙場人先世由江南來合占籍于渠江右岸之十二門數傳至其祖三省中嘉靖乙卯舉人父鳳陽登某年拔萃科充選生雲龍少承父業以州學附生食餼于庠後遭張獻忠亂攜家避地遵義府遵義縣之高坪場艱難拮据并營耕讀清定鼎後合州族人完一以小艇來迎還里○森楷案遵義不通舟楫安得小艇來迎此疑非事實姑從原文時舊有田宅已為楚來客民所佔領向索不還欲訟無據頗難為情適閒步墟墓間見廢塚中有素紙一角如新出土者發視之朱墨宛然故苟氏田宅契也蓋前避難時倉卒出亡或瘞此而忘之如蕉鹿然則為時固已久矣至是得之大喜以呈于官乃得光復舊物一如其初雲龍為人性剛果耐勤勞嘗課子讀書偶情立批其頰耳為龔三日其竄居川黔閒採栗拾橡露宿風食少暇即緝隨身書籍讀之子金薇侍行亦令同溫習如平日則嗜學如命而造次必于是顛沛必於是耳特蜀亂後平科舉尤

合川縣志卷四十五 鄉賢四

一

遲竟不及試而卒將卒呼金薇謂之曰子遭際坎坷不得展素志汝能讀成吾志吾無憾矣年五十七時康熙十一年也墓在州西北十五里之柴家溝獅子岡又百三十年其曾孫桓等以土邱纍纍日就荒蕪乃重加修砌而銘之曰惟山崔嵬不崩不騫蔚羅松柏鸞鳳來旋衿帶曲水既清且漣蛟靈起伏春露秋烟祖塋纍纍于茲百年形化而神聚兮乘雲氣以往還明德之後嶽降多賢俾爾子孫翼翼綿綿讀其書田其田更千秋而萬葉兮肅將乎豆邊桓雲龍子金奎孫也金奎歲貢生其兄金薇舉人金薇桓並自有傳苟氏族譜安居王汝璧苟乘萬墓表西里采訪員投稿王永富州永里南津街人嘉慶二十年壽登百齡張乃孚為序其事曰先君子方崖公自乾隆辛巳成進士歸選人格舉比合宗書院者十餘年予幼隨侍左右讀書得見隣街永富王翁時相往還翁營貨殖至晚每以豚肩相遺而緩其值視先君笑曰割肉一方歸遺細君可矣先君曰過屠門而大嚼不給于鮮奈何往往戲謔以為樂蓋翁襟懷磊落隱身屠狗殆古所謂夷門監者流耶惜無人識之者而先君獨器重之歲庚戌甲寅予疊主合宗講席與翁一牆之隔不相聞問時翁年已七十

餘矣因哭子喪明後得識翁之幼子朝佐性情瀟灑不拘小節然見尊長秩秩然交朋輩侃侃然未嘗不慶翁之得有賢嗣也嘉慶乙亥春朝佐來告曰家君明年壽屆期頤里中紳耆公舉建坊願得先生作啟上聞得邀寵錫感且不朽予聞之躍然而喜曰本朝定鼎二百餘年吾合壽登百歲者不數數觀誠昇平之人瑞也遂聞之當事踰年龍章下賁賜銀緞如例建坊於南津之通衢重慶太守林勉齋先生賜額曰大行重周珂里榮之今冬十月朔有二日爲翁誕辰及門譚生符瑞爲翁弟永貴公之所自出丐予爲文以壽生之言曰翁原籍廣東南海人年未舞勺卽從其尊甫尙理公泛宅於吳越齊魯秦楚燕趙之間艱險備嘗年十六始由秦入蜀寓居果州以打魚爲業未幾尙理公下世家赤貧衣衾棺槨一無所措弱母幼弟朝夕待哺親朋絕少無有拯其窮乏者遂沿江捕魚一晝夜得巨魚無算售錢若干得成喪禮安葬北山之陽服闋奉母遷居於合之南津街忽天賜金穴權子母置屋產不數年稱素豐焉娶史氏先翁卒子六朝佐行居五所存者暨第六子餘皆不祿弟永貴卽生之外祖也翁撫之成立授室同居自幼至老友愛不倦其

合川縣志卷四十五

鄉賢四

二

天性然也永貴性豪放縱飲好博人或以爲翁慮而翁聽其揮霍亦先翁卒由是家道中落絕無怨言事母盡孝出告反面率以爲常稍有過失則必長跪榻前至更闌不敢懈俟母色霽乃起及母病親侍湯藥母卽安臥亦不敢離必待疾愈而後乃安母卒喪葬盡禮廬墓三年每出遊攜錢數百凡鰥寡孤獨無不周濟每歲如之至今卑田院中猶有能言其事者譚生之言如此予早識翁豪邁高爽固非碌碌於庸眾中而不虞翁之爲人內敦孝友外行仁義以勤儉起家以慷慨濟物有爲士大夫之所難者視彼薄其天倫擁財自封或汲汲於世或蜉蝣以生何啻霄壤然後知翁之獲魚獲金壽滿百齡實天之所以報其德至若餌朮餐芝妄稱綺皓安常守拙壽延三老此蓋養生家言而非翁壽之所自來故不之及永富又二年卒享年百有二歲今南津街猶有其昇平

人瑞坊

點紅萬綠山房文集
永里采訪員投稿

馮良弼字達仕州西里沙魚橋人先世居廣安州明末亂離轉徙涪州良弼祖耀祖于康熙初始遷沙魚橋之柿子溝居焉耀祖性長厚每歲穫時輒張蓋行烈日中巡視田畝見佃戶刈稻則以溫語拊循之命家

人攜茶具及畢羅蔬菜粥飯等物以慰勞老稚工作輩遇春日問田家有食費否有穀種否皆一一爲之計時兵燹甫平草昧初闢插業受糧耕牛缺乏佃工或用四人抬犁艱苦倍常耀祖見之喟然曰牛之不可已也如是夫夫以人代牛然後見牛力之大我後世子孫有食牛犬肉者非吾子孫也以後相傳不食牛犬肉者四世耀祖生際泰卽良弼父也基宇始擴家益僨盛良弼繼之一從忠厚乾隆四十八年卒年四十四旣歿之二十六年良弼子鎮巒請其座師某爲其墓誌銘曰嘉慶戊辰予以瓊州守晉秩觀察予告歸養里中孝廉馮子遠邨壬子典試蜀闈所得士也時來京赴禮部試以大挑二等得銓教職遠致書於蓋邑並附事狀請爲贈公誌其墓遠邨自癸丑謁予京邸醕謹厚重長於詩古文詞已心儀其爲人今且十六載矣書中眷念之情與自叙遭逢款曲周詳如親雅抱知其本於家庭訓迪者深固予所樂道不厭者也遂詮次而歸之按狀贈公父際泰喜與一時文士相往來花木園林之盛甲於里中公辨色承顏無不曲當意旨際泰公晚年得歎嚏之疾每秋冬徹夜無眠鼻齁齁作鋸木聲不能就枕公以身承其背俾長坐寢次

一夕獲稍安際泰感之曰若善事我願他年孫輩之類若也後際泰公就木之年自冬徂春如是者凡三閱月人以爲苦公不自知其爲苦也每出必告以歸期親申中有強留之者變色絕裾以去人疑其不近情而不知恐際泰公閭望難安此意公未與人言在人亦鮮有知之者其事伯兄遠邨書中自謂不忍言遂不錄然其大約可以想見儉於自奉飲食衣服皆崇尚古樸而於貧苦無告輩遇新舊穀未接時負擔至廩前取斗自量以去不必先聞及西成後或酬或不酬積書紙券尺許久亦焚之公歿後村氓里老言及輒泣下曰世不少富人未有如公體恤人情慷慨市義者尤急人之急下戶貧乏間給牛種俾之一家飽煖有姜姓以女許佃人呂某呂貧不能娶姜欲悔親公給兩家穀若干石遂得嫁娶成禮延及子孫不妄取人分毫見童稚拾物於道叱使還之否則令人置故處宗族繁衍每歲燔祭集一家少長作家範十餘條教以孝弟忠信崇本務實之道是日講說之中有能勤苦具資本丐公執掌者代權子母數年後償以多金往往由此起家兼講計然之術行商居賈百凡生理牢盤握算罔不洞悉幾微所得不貲閭閻有負公財者約

數千不等公亦不以爲意也生平惟喜讀書人間某姓有佳子弟稱頌不啻若自其口於遠邨師友往來尊之禮之宿儒朱修武公家兩世師也晚年罷館不能治生迎奉里中待以舉火訓遠邨尤勤曉之大義每就傅歸來閉一樓中不令外干一事暮雨晨雞書聲達於里閭至今遠邨聲名遠播學有本源公之殫思畢慮者爲已久矣遠邨遭逢未罄所學而惓惓於先世隱德惟恐湮沒其宅心有不同於流俗者故約舉平生爲之銘曰生有令德歿銘其幽更千秋與萬世識野王之故里而爲東漢篤行長者之豐邱實鎮巒所自爲詞也雖導揚先德不無掄揚而尚不失之誣故具節錄之

晴雲山房文集紅椒山房筆記森楷附記

陳國泰名以學以字行州西里太平場人父大造乾隆乙卯科武舉國泰席父業便弓馬一試卽入武庠乾隆中知州吳涪齡委國泰簡馬數百匹於口齒唇髻鞞中身中一一得其骨相人以伯樂稱之而國泰若漠然也者嘉慶元年秀山苗叛州牧龔公素重國泰廉明委督運糧萬斛至官軍營故事運者多有浮徵浪支妄立名目爲私橐地而水陸轉輸雇役食用沈失欺蔽之耗不與焉國泰一矯其弊絲豪無侵隱其明

合川縣志卷四十五

鄉賢四

四

年白蓮教匪煽亂楚蜀蔓延於吾鄉國泰奉大憲檄帥義勇萬餘渡渠河倉卒與賊遇走馬嶺顧所部未及前謀引去伏放生橋堂狙其隙而乘之適國泰從兄以臺至躍馬馳衝賊陣發鎗斃賊先鋒眾潰事聞於總戎給六品職銜俟叙用國泰歸功其兄固辭不受已而賊大至焚掠縱恣勢甚猖獗時王師尙未赴也州人謀禦城守以國泰清正多材羣推總理軍需局事凡泉刀出入以鉅萬計國泰矢於眾曰設有攘奪及侵漁者以賊匪罪坐誅眾服其無私彌敬畏之賊旣遁國泰知其禍未已率族人倡捐千金築保全寨又屯團練嚴保甲製戎兵務爲常變足恃不肩肩於目前苟安計於是賊不設復窺其境里之耆黎婦孺見聞者與不見聞者皆曰此陳君力也國泰軀幹魁梧雄傑聲若洪鐘不獨其智勇有過人者某年國泰年六十舉人張乃孚爲序其事曰從古豪傑卓然自立必具剛強不屈之氣而輔以忍能有濟之識上之爲朝廷建功業靖邊陲次亦不失爲瑰奇磊落之士造福一鄉聲施後世其志足以貫金石質鬼神不必徵壽於天而自無不得蓋其所賦者厚而其所保者全也今如國泰封翁有足多者焉君原籍關中上洛代有簪

纓由先世遷蜀家於合之太平場百餘年弟兄三人雁行居次尊甫靜庵公中乾隆中武魁不求仕進碩德耆年爲鄉里所重以壽考終母王太孺人先卒繼母吳太孺人事之維謹因秉家風入武庠以教習爲事三弟國祥生負權奇姿出繼長房君不異視盡心指畫中庚子科武舉凡入省赴京兆皆親身護其行前娶龔宜人無出次娶姚越癸卯龔姚各舉丈夫子一長龔出卽今武科進士重齋也姚共舉子四瑤環瑜珥稱其佳兒者也伯兄國亨卒乏嗣君爲立繼撫之如一性端嚴能肩大事乾隆間西藏用兵羽檄交馳當事先後延辦軍務多所倚賴以君司管鑰入局日偕眾對神盟誓一以秉公奉上爲心州人感其誠踴躍輸納而猾吏無從上下其手故軍需爲蜀中稱最嘉慶元年秀山苗不靖大兵進剿徵糧於州刺史龔稼堂先生素耳君名委之解糧萬斛由渝江運至大營往返五閱月歷盡艱險較前運者減費千餘金刺史以此愈奇君二年丁巳達匪跳梁州奉憲檄練團堵禦君先帥義勇數千人據廣岳形勝之地躬爲防守時得以不遭蹂躪者君力爲多三年戊午賊竄入州明東君復合廣岳合定四邑團勇萬餘渡渠江與賊戰走馬

嶺克之追數十里賊傾巢出戰各團潰敗君與堂弟武庠以臺單騎拒於放生橋瞑目持戈賊疑有伏且畏其勇數鞭馬不進謂君得神助遂遁去諸團獲全師而返後賊猖獗焚掠場鎮君挈家入城守護又與闔族倡捐千金修築保全寨爲鄉人避難處僉謂今而後莫予毒也已君不習陰符而頗能用兵不甚讀書而持論暗與古合使其寄軍政假節鉞其功名豈出班定遠狄武襄下哉平居不輕然諾謙抑自下里中事有不決得君一言而斷其教督子弟維嚴一歸禮法長嗣重齋年甫弱冠卽入武庠旋於甲子乙丑聯捷成進士親挈入都往來燕雲蒯樹間諸郎美秀而文各習文武業將來可成大器積德食報不得之於其身而得之於其子者正未有艾歟早歲支持家務纖悉弗遺遇冠婚喪祭之費無慮數十次皆一手經營不豐不儉人咸取則焉初頗嗜酒繼奉尊人戒白晝涓滴不入於口夜則侍吳太孺人飲捧觴上壽叙天倫樂事數十年如一日秉氣素強耐勞苦至老而精力不衰語曰仁者壽詩曰黃耆鮐背此其驗耶嘉平之月爲君懸弧辰龔同登花甲姚亦屆五袞諸親友製錦稱觴君以吳太孺人壽享大耋正萊衣戲綵之時故不

敢辭徵序於余余與君肺腑親幼時登堂得悉一家孝友融融怡怡有
太邱元季之風姑婦妯娌閒無詬諍聲知後必有興者君雖未展其用
而爲國家任儲運之勞爲桑梓衛患難之急其所以自樹與壽於世者
爲何如也第祝嘏諛詞不足相慰惟舉生平有快事者三敬爲君述之
當拒賊橋頭時幾瀕於危矣而奮不顧身賊驚以遁得以護眾生還此
其一也當爲浮一大白夫人足不出閭巷名不顯鄉國沒沒終身者多
矣而君以偕弟與子入京師者再渡黃河者四瞻皇都之壯麗識關河
之險隘以及下彝陵過武昌弔英風於采石訪故友於金陵益以開拓
心胸激宕豪氣此又其一也當爲浮一大白君少習武事未擢一第頗
以爲憾然天賜麟種遂號家駒穿楊百步驚人一鳴此日少年白面他
時閫外將軍榮膺封誥指顧可期此又其一也當爲浮一大白有此三
快以介六表君雖禁酒自必掀髯大笑呼客痛飲唐人詩云一日須傾
三百杯知者當不河漢斯言又■年國泰卒葬馬鞍山下鶴子林宅右
其子鈔爲之誌結無銘生卒娶葬不書既葬之九十餘年碑且剝矣族
孫陳澤民爲敦本堂族譜復修理而補訂之曰公會祖諱花明貴州指

合川縣志卷四十五

鄉賢四

六

揮使卽吾陳氏由陝西遷蜀合州始祖也祖諱御道考諱簾舉人配龔
氏姚氏雷氏子五鏗嘉慶乙丑科進士仕廣西撫標左營守備鑿武學
生鈔文學生鏌鎰女一適士族孫十四人孫女十二人澤民乃其從兄
以智公之來孫也銘曰先祖荆業四世彌昌誰其健者武毅鱗鱗昔歲
在辰新壠一方厥子他山刻識幽藏馬鞍之峯封面騰驤護茲貞魄燁
燿其光曾不百齡石泐苔荒後來者責慨當以慷追鐫此詞以奠茫茫
千秋宰樹終焉允臧修譜事在光緒宣統之間今猶未刊行也

陳氏敦本堂族

譜點紅萬綠山房文集

孔殿元州西里馬頭溪人嘉慶某年年七十馮鎮巒爲之序曰維古明
德之後必生達人道義之交有踰骨肉故從來大聖大賢近有聞於時
遠有垂於後沿及子孫無問遐邇親疎窮達顯晦必樂爲之師友於其
間此中投契之故有不知所以然而然者太史公謂適魯觀至聖廟堂
車服禮器尙低徊留之不能去况里黨嫺懿先聖之後近在目前實有
平生之好者乎平橋殿元孔翁吾先師孔子六十八世孫也前明恭閔
帝時有希璠者由魯入蜀卜宅鄰水我朝康熙間由鄰遷合祖名尙文

落業平礪綿瓊以及於翁蓋已數世矣翁學未卒業隱於醫生平無奇節異行表表於世然性醇謹忠厚兼好施與凡藥物湯茗多主製以濟貧苦夏月煮茗於道用飲行人其他濟困扶危之事俱不吝多金噫懿行若此雖文采聲華無所著於世可謂無忝厥祖者歟予嘗博觀載籍每怪聖人之後不生聖人幾疑尼山發祥而後有所間歇又怪秦漢以來太傅孔光北海孔融勛伐文章震靈一時其出處進退之際有未可盡言者洎乎國朝草昧之初平南王有德爲開國元勳至今山東諸孔譜牒不載豈以其重若彼其輕若此無亦聖人之後固有所以爲輕重者而不在名位之赫奕歟我朝尊師重道軼於前代凡孔氏之散布天下者例給奉祀生除正供外一切夫役雜稅俱予優免而合定兩邑之間惟翁家更爲殷富詩禮門庭不愧其先此必實有能克自樹立而非第攀附遙遙華冒者乎因憶今春三月予赴試禮闈號舍中得遇孔君繼業年甫弱冠已登賢書同輩皆以世兄稱之因自言往歲同衍聖公來京師以七品服行釋奠禮於成均無少長環向傾聽樂聞不厭夫以東西南北之人聚處棘闈尊之若師友親之若骨肉惟我先師教澤之

合川縣志卷四十五 鄉賢四

七

廣有以連絡之而况某等於翁生同里閭其情誼更當何如耶是歲十月六日翁及德配夏孺人年且七十矣長君太學昆仲謀所以稱觴親族爲之釀金製錦翁二孫廣涵廣業又嘗從予遊也不敢爲祝嘏膚辭爰爲之錄其懿行溯及先世並一時交誼之重知吾先師之澤歷六七十餘世而未有艾也斯真大德必壽矣翁之壽寧有既乎謹拜首颺言而爲之序殿元爲人本不足奇今以鎮巒文而存之亦見名家作文不爲虛美故可貴也

晴雲山房文集

馮國槐字廷植州西里太平場人嘉慶十五年葬其妻石因自爲壽藏而請同族舉人馮鎮巒爲其誌曰吾宗有長者曰廷植先世蜀之通江人曾祖尙賢生天啟七年丁卯因亂避居黔中生四子長良貴次應貴應貴生詔詔生子五公其四也尙賢公自黔西始遷重慶至江津再遷合州地名三溪子祖應貴復置業於雙觀寺至公保世滋大式廓丕基再置業於太平場萬家壩良田美壤輪奐維新人物豐美以耕以讀遂稱望族焉公爲人坦直忠厚然諾不欺喜急人難兼好施濟乾隆戊戌嘉慶丁卯兩歲大饑米價騰貴道饑相望公出粟若干石設粥廠於所

居之遠近淖糜以濟數月所活貧民甚眾嘗宿雲門鎮旅店中有遺襪者中裏多金晨起匆匆竟去公追至前途悉還之蓋往州城市貨物與子完婚者也平生於鄉里借貸不事鉤鉅坐累至一千餘金凡持質劑來者前貸未完以貧苦告復貸之雖子母一無所償甘爲所中或從旁勸之公不以爲意先是公以修創基業經營過勞得咯血之疾幾不起一家皇皇已備衾歛忽有吳某自門外來持清水一盃咒之使飲豁然頓蘇吳曰生平不解勅勒之術昨宵夢一老嫗言馮某得不死教以如是叩其地在萬壽橋响灘子是我住處故今日來救公後訪其地巖間有大士像爲之營閣招僧至今公年踰六十聰強不衰意者釋天眷佑公存心處事必有所以獲邀神貺歟德配石孺人善事姑嫜宅心淑慎以勤儉佐公起家享年六十有四卒某年月日子三長正品次正伸國學生三正誼業儒孫五天健天與品出天續天瑞伸出天池誼出公世系與子家寥遠然先代俱蜀人先世父存日曾通慶吊故於巒爲老輩行又公三子皆從子受業以時來往其家因得詳悉長者行事誠吾宗之望也嘉慶庚午予薄宦清溪三君偁娒請誌予以預凶非禮然古有

合川縣志卷四十五

鄉賢四

八

生壙之文故援例書之石孺人先掃泉榻將來與公並祔亦禮之以義起者也琢此貞石以待百年廷植後以壽終

晴雲山房文集

顏容齋失其名州興里菱角坪人張乃孚嘗爲其五十壽序曰士君子讀書慕道卓然自立涵容以養其氣和平以種其德上之獻策王廷爲國霖雨必慈祥愷惻之人次亦不失爲鄉黨自好之士爲人排紛解難而不辭雖顯晦異途要皆不與草木同朽此其人吾愛之慕之恆不數數觀乃今得見吾容齋竊有以自豪也君爲復聖裔著姓山左先祖潤宇公自黔遷蜀居合之菱角坪伯父敬夫公登壬午賢書不樂仕進乾隆中恩賜國子監學正得披象服士論榮之尊甫濬夫公善理家政以清操碩德見重鄉里生丈夫子三君其季也伯兄早卒仲温若礪行力學有聲黌序席豐履厚世德相承君長粗涉經史恥作章句儒慮家譜散失釀資遣族人遠赴東國求譜卒編次以歸成一家盛業性慷慨尙義親友有急不惜以身赴之而未嘗見德能識大體不責人以所難間有經旬涉訟得其一言解釋談笑杯酒咸相委以去真能化大事爲小事化小事爲無事者以故閭黨有端人之目嘉慶三年教匪不靖蹂躪

合境我皇上命將守嘉陵江維嚴君以紳士奉委協督鄉勇稽察木馬
沱一帶水卡時賊從廣岳竄入烽火連天民驚惶無措紛紛奔潰至東
渡口爭渡武弁不辨真偽以守成命弗許徬徨河干君奮然請曰兵以
衛民民渡河求生此不之拯倘賊眾相逼無所逃避使數萬生靈盡葬
江流無裨於事甚非聖天子所以用兵救民之意若慮奸匪混入有失
事機僕請嚴加盤詰雖以身試法終不忍坐視士女仇離也監河者不
得已轉稟閩府持令箭付君責以重任由是日昃不遑寧處辨形察色
小舟數十往來載送三日而畢全活者甚眾卒未覆事而賊亦遠遁永
瑞菴總戎因此益奇君每事商酌行之欲授以軍功假此博官君力辭
乃止繼之副將趙公亦深相結納焉七年桂參戎涵追賊至州之東岸
偶患瘡疾君薦醫求見一藥而愈談兵機多蒙採擇細述山川形勢道
路險隘何處可以進兵何處可以截殺桂領之以行遂殲賊百餘人於
麻柳坪復生擒數百人加陞副將後桂擢署重慶總戎君一葉扁舟訪
故人於軍門刺甫入忽重門洞開桂便服出迎強由中門入至書室握
手歡若平生款曲備至翌日張筵招飲促膝談心坐無他客一時麾下

合川縣志卷四十五

鄉賢四

九

戎伯遊騎莫不驚嘆區區書生何以傾倒若是而不知其相交莫逆有
自來也居數日辭歸口不及公事眾愈欽其立品甚高承祖父餘業買
田釣魚山下有宅一區廣植花木饒園林之趣嘯歌自適今夏四月某
日爲君大衍誕辰同人製錦備觴問序於予因思陋巷屢空樂道安貧
君饒於貲似異簞瓢家風然富而好禮坐客常滿族中公費私爲墊賸
初不較量錙銖而力田貧乏者歲稍歉輒讓其半未嘗取盈此其襟懷
磊落與積財自封者不可同日語其子弟眾多類皆恂謹雅飭無田舍
喬野習氣豈非鍾山嶽之靈而能遵行顏氏之家訓乎予與君齟齬交
兼託婚媾暇日過山莊必留信宿得備悉其家世行誼如此故歡欣而
樂道之介眉之日相與坐鋤月山房傾佳釀朗吟一通不獨君聽之心
曠神怡卽賀客亦眉飛色舞也他如五十當富貴之說詞頗近諛且逍
遙林泉遠勝軒冕固不爲君設是想矣辭皆徵實則容齋行誼固不僅
以不仕爲高矣

點紅萬綠
山房文鈔

黃遠謨字業臣州東里石龍場人舉人道中從子也道中自有傳張乃
孚于遠謨存時爲之生傳曰君父德澤公生子二伯兄嬉不事事君性

別方豪爽當束髮受書卽喜談古今孝義諸軼事至激烈處輒憤形於色宗黨咸異之黃姓族繁衍率多貧者德澤公兄弟九人序居仲僊於家政君不忍父之勞遂棄讀而賈代其經營凡諸伯叔昆弟一切起居飲食婚嫁喪葬事無鉅細皆以身任之嫺戚之以貧乏告者無不人人得其意以去不繼則室張孺人脫簪珥以助之而其實君囊中並無餘財也會德澤公憫其勞瘁難支始議析箸君推產讓兄自甘貨殖而奉父母以居晨昏罔懈念兄乏嗣以次子承祧微窺不愜兄意復爲之娶妾生二子而接嫂氏來家妯娌相處無間言父年高遇親舊子姪深加愛恤輒居舍寄食君常在側所需不戒而具父每語人曰吾今乃知有子之樂矣他日歲荒黃氏一宗或不憂乏食乎居父母喪哀毀周至歲時伏臘猶潛焉出涕孝思之永二十年如一日乾隆戊戌歲大饑民多餓死村市相望君喟然曰人皆餓我獨飽奈何曷販諸以賙窮乏乃糴米他處而汎舟歸場米價驟昂較市減四之一擇族親中強有力者給本往來貿易不絕多得贏餘民賴以供饘粥所全活者甚眾老弱孤寡待以舉火者復數十人悉出居奇之勝算也六叔斗南先生以己卯經

魁筮仕山東蓬萊丁內艱君匍匐往迎相慰倍至服闋任莆田縣未數月病故聞訃星夜馳聞經理其喪歸計無貲留滯五載沿門托鉢得同官資助始扶襯護眷口回川嗣因歷任核減咨追來合君知堂弟遠復不堪任事令偕族人遠避挺身詣官庭辯得解卒以產盡報部豁免不貲後患其才幹有大過人者遠復遊蕩忘反君走數千里尋覓不遇半年乃歸友于之愛戚戚然也諸叔中之無子者每爲之納妾延嗣其有子不克肖老而無倚者亦迎至家養之終身有友遠出而不能養厥親者時供其乏困歿則買棺以葬之後友歸悖義君未嘗責報焉他如倡修橋梁置義塚營佛事以度死難立報單以撈浮屍掩骼埋胔焚諸債券千有餘金其慷慨尙義類如此予觀世家大族讀書明理阡陌聯屬而於伯叔兄弟之間往往以財產相軋見利忘義甚且操戈內指雀鼠訟庭並不復知爲同氣也者又何論谷風陰雨也今君以樸野之姿而素明大義家無中人之產而樂善好施待戚友如此則宗族可知矣待尊長如此而事父母之能盡孝又可知矣聞者能毋興起焉子深有感於茲事故臨文太息樂爲之傳以遺其子兆全俾藏諸其家贊曰棊臣

與余訂交三十年前戊午春過偶閒書屋有浙閩之遊殷殷丐子作薦書當爲同鄉友數札付之後聞其歸病廢家居不獲朝夕見復聞居鄉多善行然後知曩之遠遊營利者皆爲周濟計也賢者之不可測也如是教子甚嚴長兆全舊遊子門早歲獲雋卓犖諸生間今課讀城中因得詢近狀目復明而腰腳甚健宿疾頓瘳豈非爲善之報耶昔云天道無親常與善人太史公不謂然以斐臣觀之人事齊而天道可知不信然哉不信然哉遠謨後以壽終年七十餘子兆全州庠生點紅萬綠山房文鈔文輝字字星樞號中衡州西里天星橋人乾隆中入州學爲文生嘉慶十一年卒馮鎮巒銘其墓曰君始祖子愛崇禎甲戌武進士任貴州平越衛總戎順治八年回合高祖登榜曾祖在茲廩生祖開西生二子長湛字作霖邑庠生次漢字作人卽君之父也先是作霖生五子君行三作人無嗣卽以君繼析箸時田產取十之一以作承嗣本業餘作五股均授君安之無忤容斯其見誠有大過人者嗚呼宗法之不講於今爲甚矣先王之世嫡子眾子有小宗而無大宗者有大宗而無小宗者又曰爲人後者爲之服今世之律曰繼嗣繼賢與嫡嗣等蓋旣統於所宗

則不得復顧其私故降而爲期升而爲三年仁之至義之盡也薄俗不明乎此垂涎於家貲多寡而承繼之意已微甚且爭繼爭產鼠牙雀角糾結纏綿馴至於覆敗而猶未已聞中衡之風其亦可以稍愧矣方作人公之歿也君甫弱冠旣理家政兼事詩書內外出入以一身任之卒克蜚聲譽序名實兼收事其母李太孺人承顏順色終身不倦所謂無忝人後者歟君勤於教子靜齋康侯先後在子門八年每晉接誼誼以二子文行兼修爲屬薪水之費燈火之勤未嘗稍缺有間以故予輓君之詞有云交聯兩世東西席魂返三山鸞鶴雲君所以期於二子者甚至卽予所以期二子者今後更復何如耶君性仁慈嘉慶戊午達匪不靖避難明西及歸鄉里見白骨相撐目不忍矚出廩中粟丐人收而葬之厚可知也君生乾隆壬申四月二十四日亥時卒嘉慶丙寅年十一月二十七日寅時享年五十有五葬鳳凰山祖塋之次元配陳氏早卒次配何氏亦卒三娶嚴氏子三長定字靜齋次安字康侯俱庠生三宣尚幼孫紹衣紹郃銘曰昌黎表墓劉叉笑之苟行誼之允篤詎載筆之非宜青山墓田來穴丹鳳卜宅冥冥祥集斯眾維潞國之後賢匪公鼎

而侯阡子茲紀實既固且安其誰曰不然

晴雲山房文集

潘光美字文華州西里官渡場草坪人後遷龍市鎮之坂堰其曾孫開錦爲其傳曰公生而警慧侷儻不羣束髮讀書輒能通曉大義因理家政遂廢學維時家不逾中人公勤儉持家善於理財銖積寸累日新月盛不數十年增置田谷五千石有奇並營華屋者四嘗自笑曰以吾積家之功用而積學未必不能掇巍科取高第也他日子若孫讀書勿懈丕振家聲吾無憾矣貌英偉隆準高起紅若塗殊兼嫻武事當嘉慶戊午達匪王三槐之蹂躪合岳也總督勒保督師征剿軍抵田家院糧乏矣賊氛愈熾時公爲天平寨領袖聞之急率寨眾運米數百斛直詣營門以獻由是官軍得食復奮與賊戰大破之斬首萬餘級賊遁去總督獎之曰今日之勝君之力也俟當請題以勞君公曰勿庸也吾儕獲聖朝高厚之恩衣租食稅以長子孫俾得早覩昇平爲快他非所願也總督聞言大奇之是役也公着紙掛乘青驃風致灑然賊眾見之皆曰此天人也不可與爭鋒相率遠避至今紙掛猶存蓋用十餘層草紙以油浸作一幅縫紉而成雖銃刃莫傷也嗚呼公之神智卽此亦可想見矣

合川縣志卷四十五

鄉賢四

十一

公爲人方嚴精敏洞達機務戚黨有大事眾情忐忑公出其特達之識決疑定難莫不熱服雖鄉紳里耆倚爲泰山之安者數十年如一日尤好施予義之所在任心爲之雖費不貲不惜也先是乾隆戊戌歲大饑流亡載道公行平糶法全活甚眾復倡修社倉於金魚寺中集谷三百餘石有里豪垂涎不獲遂以挪欠構訟糾結不休忠樸者累如戴鰲訴於公請代昭雪公曰是吾之責也力爲控於重慶事遂已乃爲重定章程倉分爲三生平寬宏簡重無蹊勃險刻之行嘗得陰隲文註證毅然與公化劉公刊刻行世用勵風俗蕭家場合岳界地也場內無賴多蓄楊花女妓散布各館唱曲侑觴藉爲勒搯之階一時破產亡身者不知凡幾公慨然曰擾擾塵寰淫惡首重茫茫孽海彼岸誰登不及今剪除此頹風將來色魔獄中又不知添幾許慾魂也由是呈其弊於合岳二尹請示禁革筭無賴逐楊花泐其原委於碑猶憶咸豐壬子春賀節於岳邑陳滌泉師家座閒二三鶴髮翁猶嘖嘖樂道其詳且曰如令祖之遇事敢爲可謂大有造於桑梓矣公生乾隆十一年丙寅四月二十四日亥時歿道光五年乙酉九月二十四日未時享年八十開錦兄開銑

書其後曰古豪傑功立萬里德垂千秋往往文墨不載於口碑雖曰秉筆之失亦豪傑之不幸也公分社倉除楊花以及助糧克敵何莫非有功當世至今父老猶樂道不衰遺澤深矣傳直書之事文俱足千古乃陳黃二公壽文竟無一筆及之豈二公當時未之聞耶古云鼎鑄之耳雖具如無二公之耳必有異焉抑豈以爲不足傳無妨烏有先生觀耶果爾子輿氏有言曰君子之所爲眾人固不識也悲夫

潘氏支譜

張世榮州東里龍洞沱五郎壩人性孝友而有膂力號稱勇敢乾隆四十六年大竹囑匪胡範年等竄入州界到處劫掠世榮父之忠鄉居獨處未之知也一日以事至龍洞沱值範年匪夥劫場擄之忠去或以報於世榮世榮度賊走未遠亟率鄉團數十人間道往截遇之鼓勇直前團丁亦相從奮擊胡範年等二百餘人不能敵皆散走之忠得以生還俄範年竄劫草街子官兵數百人往擊反爲匪敗卽世榮之勇可知已鄉人既敬世榮之孝又服其勇公舉以爲保長世榮天性慷慨嫉惡如仇遇不平事輒竭力匡正倉卒不如意卽全神注之雖犧牲身命無于憚事亦往往以解人因循之爲張保長張保長所至事無久轆轤者不

合川縣志卷四十五

鄉賢四

三

特積威亦積誠所感也同治三年卒年九十餘妻王氏六年卒近百歲矣

東里采訪員投稿

易安字宇正敏州來里尖山場人其家傳曰公七齡失恃事庶母以孝稱性耿介不苟取見大義不爭瑣屑弱冠析居嘗憤然於家計日迫而家聲難振也乃聯合兄安憲安漢爲分而復合之計迄今丁齒雖繁而衣食不至告匱者公裕之也每歲終輒以石米斛豆周濟貧乏陰誠無令人知兼施棺木藥餌拯濟疾苦借貸難償者悉焚其券曰此亦差堪補過也壯歲爲錦城遊觀棘闈試喜憤交迸歸督子弟讀書程功綦嚴雖後亦有採芹食餼者二三人實猶未滿公意也卒年五十歲貽有居家要言八則曰勤曰儉曰公曰慎曰忍氣曰吃虧曰勿記小忿曰勿聽婦言又捐刻六字經板勸世子玉澤字金濟號靜山別號伴雲山人玉澤幼慧讀書十行俱下師儒長者皆以大器期之嘉慶中安字自成都歸以家無鄉試者引爲大恥課玉澤讀督厲甚至玉澤益發憤爲雄博通經史俛爲文陳飛將軍筆鋒所至辟易千人遂以弟一人領鬻案爲州庠生安字心爲一樹願困于棘闈屢薦不售肄業錦江書院七年卒

無以副顯揚望玉澤亦無如何也然明于大義事親色養每先意承志不沾沾於雞豚之奉而見義勇爲不憚艱險如河決激流沛然莫之能禦又如怒馬奔馳必竭其力而後止則天性然也先是安字謀修易氏家譜商於族眾以公意命玉澤玉澤受命遂搜集家乘證以上湘易祚鳳所編慶源集詳攷始末存其信闕其疑越十餘年稿草始就終以未見新化舊譜不敢執以爲是欲躬至湖南求之方動議而安字歿不果行服闋族眾賡續前議玉澤慨然東征數月得舊譜及所拜埽墓圖以歸更互證參考加以筆削又閱四歲乃成玉澤爲誌其始末曰古有宗法小史職之自五宗之法不行於天下後世士大夫之家欲以紀前烈別氏族舍譜奚以哉故程子曰宗子法廢譜牒尙有遺風譜之修也由來尙已我易自康熙丁亥入川以來蟄蟄振振椒衍六七世繩繩繼繼瓜綿百餘年然於歷世親圖率皆手筆相承未有譜牒嘉慶庚辰秋澤不才始以祖德庇蔭叨列膠庠先君子正敏公以芹香伊始慨然有敦睦族之思爰與閭族伯叔等殷然會議以輯編宗乘之事命澤澤聞命勝任未遑欲諉不能乃於誦讀之暇搜集家乘及先人手澤並得上

湘廷儀祚鳳氏所續編慶源集本宋之山齋公而又唐之斌公所修者因得詳核始末考訂源流溯自愷祖受封易水錫姓後移山西太原陽曲縣引龍江遷太倉者爲仁福公徙瀏陽者爲萬年公雄公之子天驥遷豫章吉安太和數傳而至亮公生四子歡邦述達各自安土重遷邦公之後俱徙益陽述公之後世守廬陵太和達公之後世居萬安惟我歡公志存先祀遂自太和歸長沙卜居西寧瀉上三傳至四十二郎生彪公四十三郎生麒公麟公遷居上湘七傳而生炎正公又四傳生聞遠公俱籍湘鄉遞及明初我京林公乃由上湘而遷新化又七傳而至國義公始由楚遷蜀卜居合州西境來里焉此吾宗支派源流之大凡也第以新化祖墓未經歸省終屬歉缺故十餘年來譜稿雖成尙未付梓而先君子與諸前輩半資志以歿存惟一二殊堪痛耳道光丙午春正月本房先輩漢公正川等輩恩公玉貺永公玉成第公玉瑛幼輩介臣肇廉餘三肇學健夫肇行吉士肇麒及澤等九人首倡義舉捐金作費囑愚下廣省墓清譜時以萱幃衰老不能暫離有難焉者母氏蹙然曰此何事哉汝當善成先志余雖老悖不汝繫念也時二弟玉印玉潢

亦堅以奉承甘旨自任澤始得偕玉玠弟身赴南省披圖蘇蘿涉歷大橋江桂竹園抄水灣木姜溪抱木田等處先塋拜掃歸來祖墓譜牒釐然圖繪手編其於先人謨訓功烈禮制文章悉遵舊集毫不敢遺閱四年庚戌劄劄告竣似覺本本原原根株悉備第因族眾人繁心思各別閒有勢難強人者族未盡收不無遺憾然理其緒而支分派別比其類而從宗合族雖川廣異地而先塋祖墓燦若列眉桑梓里居燦如指掌閱是譜者篤親敦本之念孝子悌弟之思當必油然而生矣卽先君子與諸前輩未酬之志亦聊藉是以稍慰矣書成族中賢明者僉援太史公之言以相况曰天下之俾頌周公者言其能論歌文武之德宣周召之風達大王王季之思慮爰及公劉以尊后稷也是說也前人如斌公與山齋公或足當其萬一予小子則謏陋不堪蓋嘗往復流連不能置云時道光三十年也咸豐二年卒年五十有四著有合州易氏族譜敦實堂稿若干卷安宇從弟安權字正柄孝事二親至六十以後猶依依孺慕色養不衰家本素封而節約自安食淡衣粗晏如也至造橋修路賑恤貧苦諸善舉則知無不爲爲無不盡力初未嘗色然有所吝弟安

合川縣志卷四十五 鄉賢四

五

和早死遺孤三安權並子視之以教以養至均能成立乃與析箸族人
有券借數百金者貧無償安權遽還其券族人感謝而去道光二十一
年卒年七十五

易氏
族譜

劉道勰字仕泰號燦然州東里涓溪場人十四歲喪父遺弟一妹三皆
幼稚惟道勰差長勢不能不廢讀理家事卒能辛苦成立教子自綽爲
學有聞及自綽遊覺道勰已前卒矣自綽後于道光二十二年修劉氏
族譜追爲道勰行述曰先君性英敏志行磊落光明尤善書法喜閱古
籍居家勤細務必身親節儉不尙文飾粗衣淡食宴如也嘉慶四年叔
道一病不起先君哀泣甚時張氏孀無嗣將求去先君留之曰願將吾
子自韜爲汝撫汝能繼夫志汝夫爲不死矣然亦不能強從事遂寢先
君每念及此未嘗不發汗沾衣也行年三十援例入成均居恆省身克
己厲行陰隲文功過格諸條刷有西江月感應篇因果錄各數百部傳
送四方常言存好心行好事天必佑之以故好施舍不吝多金見人困
苦輒傾囊以助視提攜親戚分財交遊爲自分所應爾者然人有禍患
救之如恐不及有德於人無報施意有怨於己無計較意人有望其事

濟以白金五十交先君手爲之斡旋事諧後仍原金而還之不受分毫其他素行可推己里黨有罪幾於死者四人賴先君得以獲全此臨終時言綽今述之猶宛然在目也至於待人接物則寬平樂易使人見而可親不矜己任意無傲慢以凌人交不擇貧富而人之相習與所不相習極智愚弗齊之倫皆必從容言笑相與談論終日形色不倦其豪情盛慨又別有一種瀟灑出塵之致聆之久不覺意移也先君生平重詩書道德人之學業可欽行成名立者愈加親敬爲愛慕欣賞贊嘆者久之舉其行爲證鼓舞演說期使男等心悅誠服從而效法焉其訓詞有曰人不讀書不知禮義金玉土泥之分柴先生嘗言之矣吾門讀書三世前爾祖尙已繼則爾季父道一性沈潛能讀書吾日望其成立不幸早世今爾等能讀須當憤志寒窗以繼先業無負予屬望心由是延師極其誠敬或三五六日必親來學館向先生問吾子學問文章何如近日工夫有長進否其珍重斯文之心形於寤寐見於話言何勤懇之無已耶卒年五十有四繼祖妣趙氏尙存可悲也自綽道光二十年文生見士族譜

東里劉氏族譜

合川縣志卷四十五

鄉賢四

七

劉繕字完初州城內人父燦黎以歲貢生官內江訓導舊志傳自其祖潮洲至繕凡七世皆貢于鄉而選舉志貢生類僅有燦黎不載潮洲及潮洲以下四世之名書缺有間莫可得而詳也繕性孝友事親盡禮親歿遺弟妹皆幼弱繕撫之有恩比婚嫁後猶愛養無衰少從儒生王建元受業建元歿無嗣繕爲經紀喪葬每歲祭埽如先塋渠縣鄉宦張直方繕故人也身後逋負累累索責日急其家不能支走告繕求爲計繕往與清理分別公私緩急設方畧緩減之無可解免者乃出己貲代償其責張氏家得不破繕之力也繕後仍以歲貢生終子駿字樸侯亦州庠生以勤儉起家頗擴張舊所有業作富人居而生性卞急不能容物筦公局尤綜覈自書役以下皆不便所爲道咸之間州人積苦鹽商串通官吏弄弊病民而莫甚于巡丁與私販鬪釀命貽累亟議援照他縣鹽課歸丁之例改由五里隨糧完課而撤銷原有商店以甦民困議久不決駿首領銜上請仍虛擬商號名曰永來興以實之邀准立案立碑商店遂由此撤鹽商銜之次骨而駿行已寡過無可乘不得逞會知州榮慶祀孔失儀爲駿所糾恨之鹽商得聞卽誣告駿通匪又密賄其家

人以曖昧事污之州官遽逮捕驗拷訊鍛鍊成獄革衣頂流甘肅數年

程業修合州志與里采訪員譙輝張投稿

死州人至今猶以爲冤而劉氏後遂不振
黃皓字金美號利東州西里天星橋人年五十六卒歲貢陶鳳占爲其
傳曰東漢節義之風曠代所無而氣度之淵涵立身之醇厚正必以黃
叔度爲最聞風者俯首覲德者傾心若吾所欽佩利東封翁豈其苗裔
耶何世德之維肖也翁父執中娶馮夫人無出年六旬娶張孺人始生
翁及翁弟暉與妹共三人執中捐館翁方弱冠值達匪蔓延在兵燹中
喪葬悉依家禮惟恐以倉卒遺憾馮張兩孺人皆享年八十餘翁盡心
色養以終天年附身附棺事事盡禮蓋孝順其天性也翁弟暉析箸後
家中落遊楚學道於長春觀翁惜其無子力挽勸之不能遺一女翁撫
育遣嫁愛逾於所生一切未完之務悉身任之不辭則友于之情篤己
翁稟性嚴毅言行不苟凡里中鼠牙雀角之爭得翁一言而解尤喜行
利濟事如舍藥施棺以惠存亡修橋補路以便行旅恤孤憐貧以周窮
約在他人或出於贏餘而翁於衣食內裁抑齒積爲之尤難憶道光己
亥七月朔日爲翁周甲之辰親友謀製錦稱觴公辭曰減二疏公宴賓

合川縣志卷四十五

鄉賢四

七

客之金足以行賑救停平原君十日之飲足以惠宗族胡不去無用爲
有用耶由是貧苦族親資以舉火者眾次年庚子米貴如珠倡建平糶
外復以米入市減價出售半月而米價平歲暮又焚券免追逋其慷慨
好義鄉黨至今猶嘖嘖稱之翁第五子德正茂才名列優等第二限滿
甫二日而廩缺出學師欲通融具報以成全之翁毅然不允曰名有定
分無妄干也其策勵後生進必以正如此翁持家以穡事爲重孫曾不
能讀書者卽課以耕決不許操奇入市以爭錐刀之末故所行方便事
皆取諸菑畚所獲者未嘗賸削他人之財其他取予之間一介不苟皆
此類也翁生於乾隆四十九年卒於道光二十三年葬西里三楞溝並
萼堂之左子八德沛武生德正歲貢生見士族譜西里采訪員黃秉鉞投稿
李一德字玉龍東里三雁壩康家漕人幼遭達匪之亂父母挈以同族
眾避山硎中賊攻之不下薰以毒烟皆斃獨一德食母乳伏腋下得以
不死其季父廷選字春芳者適先期出硎未與其難李氏一門不下數
十百口存者止此二人而已亂定廷選理家政一德就傳讀能屬文尤
善行書累試不售改習法律充本州刑科書佐勤慎辦公前後二十年

未嘗有過退居鄉里排難解紛訟事爲希而廷選則以勤儉居積增置田租八百餘碩過其初三倍矣比析炊仍三房派分初不毫釐自私利也一德旣感廷選之能而公又鑒於蘊利生孽見有貧不能婚娶者時出所蓄資助之或乏貲營貿而假借不少吝獨慵惰者分文不給雖至親不惜也待客戶甚厚歲租未嘗一取盈歲時來謁飲饌特豐或親與談讌以其終歲作苦爲犒勞以優之也有欠金穀不能償往往寬免不較且焚其券鄉里嘖嘖稱之然性方嚴族黨中膏梁子弟歲時過從以車馬衣服相炫耀則故以敝衣履相形見絀飲後必促之早歸不流連廢事貧親佃戶知其意送新蔬至其家則立門外不入必呼之乃入爲具飲食給優價去鄰有飼鳥者必買放或以媒囹相給雖知之不問也晚年尤有遠見里人以田來售則面與議價不輕爲中人所持嘗有自言田值二千四百者則言雖二千八百亦可或疑其戲言竟如數與之所置桂花灣祀田旣成價矣售主族人來爭一德自願加價二百金免訟孫三清以爲不值不肯與纏訟三載卒予之乃息三清問其故則曰平價誰不願得之一過其贏斯爭者息矣吾季父生平買田不少而無

一處涉訟者正明于此理耳故常見訓諭曰彼以訟破家者皆以不喫虧之故人能喫小虧必不喫大虧能忍小辱必不受大辱也吾奉此周旋幸無大失汝曹識之無再蹈前轍也三清頓首受教遂終其身無田價之訟先是李氏自楚入蜀五世矣墳皆土壘未修砌慨然以爲己任獨出資修之族人以風水相阻撓則召集會食具申己意迄得如志乃止每歲首族人春祭必飲食其家甚悅喜以爲敬宗睦族之一道也數歲必追薦先祖及族人之故絕無祀者以爲陽順陰安道固如是耳常發起族譜義田以敦雍睦未果心常歉然謂子孫庶幾補我缺也獨不喜作生日初有來侑祝者還所餽而謝絕之故自五十至八十皆未一燕客不獨惜物命亦惜福也年八十八以光緒六年卒子二文孫三清三秀曾孫四端四聰四輔四知四靈皆援例得官封贈如例廷選渾厚精明人不能欺諱名爲九猴子然廷選雖工心計實止內勤農桑外精貨殖初不朘削一事刻薄一人嘗言人好奢吾以儉挽之人好爭吾以禮平之人好詐虞吾以至情至性感之是以周旋晉接善氣迎人無或失言色者晚年偃樓益恭與人言煦煦如恐傷之人轉見而尊焉皆呼

之李九公唯其初生時母頗嫌子多不欲收養叔母王以其聲音容貌俱非凡兒苦勸留之乃止後母早卒王死洞烟之難未報其德終身引爲憾事而其性情之摯亦可想見矣今其裔孫亦振振繩繩與一德曾

玄相伯仲也

東里采訪員投稿

胡子燭字暘谷州東里獅灘場人其家傳曰公世承先業經明行修嚴禮法事親孝事兄敬教子弟嚴而有法每歲時家讌子弟捧壺巾侍側無敢倦惰雖盛夏未嘗裸裎鄉人每聚會喧譁見公至輒腆然自散其爲人禮敬如此至今族人謁其墓者必嚴謹修容而前曰此老最恭敬不敢不恪乎平居簡默與二三良朋共話詩文輒竟夕不倦所着表衣雖十餘日不易而無纖芥之塵所讀書常若新購未嘗有手觸痕每日早起輒自掃庭院以竹箴去池中落葉寒暑不倦曰藉此習勞可以卻病耳所居室墻壁皆手書字畫日日拂拭歷久若新屋外隙地遍種花木無穢草無濁流屢應童軍不售年六旬以耆老上聞得錫冠帶閉戶教子以終子二惟由之公能傳父業由之公諱宏坦暘谷公長子也天性孝友好學不倦制藝外尤長詩詞其行一遵暘谷公遺訓而尤重敦本

合川縣志卷四十五

鄉賢四

九

睦族之道常欲赴楚訪求宗牒會族人子塗自楚攜譜來川校對遂得據爲底本期年譜成欲付手民屬有賊警中輟訖今譜存紹果家手澤猶新也公治家有法作家規八則以訓後人一敦孝弟二肅規門三勤職業四尙節儉五絕非爲六息爭訟七禁嫖賭八戒洋煙現載家譜每條後附七絕一首生平除應試外不接官長不入公門鄉里無雀鼠之爭家庭無谿勃之語凡暘谷公所置之器物宮室不敢稍有損壞晚年含飴課孫歲無閒日先父立三公之學根本有自矣至於務施予明禮讓猶小焉者其玄孫胡紹果之詞也宏坦子開鈞自有傳

本局校錄員胡紹果投稿

李天吉字文科州東里獅灘場人卒年六十五歲舉人周作孚爲其墓志銘曰李氏家世耕讀公生而端厚及長益就檢閑幼讀書未能卒業然揆其所行卽世所號爲經生家日手一編者亦無復能遠過平居敦孝友篤氣誼其事朝泰公也養志承歡最善體老人意不敢拂朝泰公壽逾耄歷數十年如一日誠敬無稍殺兄文亮督家政公事之謹凡有教命無面忤亦無後言其處諸兄弟亦恩義兼盡鄉人以爲難原配楊孺人中歲病廢始取副室吳理中饋而於楊恩禮無闕也楊生子六女

一適徐教以立身教以成家教以接物嗣君輩亭亭楚楚磊落光明蓋皆得於義方之訓焉夫人生斯世其大要不出家庭父子兄弟夫婦之近無愧者斯為完人而公能全之不誠卓卓可傳哉雖曰未學吾必謂學卜子夏當亦欣喜而道也公雅量善飲遇知己二三輩嘗痛飲達旦夜闌燭燼談笑益豪性剛方嫉惡如仇里人或以事爭是非公立剖之無所情狗鄰邑有為人奴而暴富者與公同宴席位公右公詢知之即面斥其主人同席皆失色而公自若也吁大呼移床遠客之風猶得見之近世歟公生乾隆五十六年辛亥歲二月初四日沒咸豐六年丙辰歲九月二十日享年六十六歲生沒俱在本里一為小趕塘柏樹屋基一為莎草灣子名次列碑面茲不贅銘曰華瑩山厚宕渠水清中有幽人抱璞守貞世雖居今其人則古富而不驕師為善主峩峩佳城既固且安澤流定遠庭有桂蘭兄文亮自有傳李氏族譜

朱汝蕙州興里人森楷任修志役設局東岳廟時見道周有所立碑序述其先世居廟側以檀越資格維持廟事甚悉詢之士人則其子孫猶有存者並農樸不能述祖德而導觀其墓側箴言約言法言義言咸在大率為謹身寡過一流亦吾邑行誼之一人也擬搜其軼事為立傳倉卒不可得意頗歉然久之其里人劉景輝乃以其所為朱先生傳略稿來投傳曰先生姓朱氏遺其字與里楊家塆人也森楷案別音力也字本不古吾邑俗地名見無作別者則誼亦不今大約楊家塆變文耳賸平聲土音讀作去聲原不甚合然以名从主人之例推之固當作楊家塆不知劉君何取而改作塆今姑從元文書之而辨訂如此先世順乾公啟禎間避亂入黔居播之忠莊村傳至冠康熙丁未回籍入邑庠曾祖諱光世補弟子員叔曾祖諱光奕以選貢授巴州訓導祖諱永文著籍博士伯考諱澍恩貢生以學行見重於鄉考諱灑字正綱入武庠生先生兄弟四長汝棠次汝燾三汝樛俱補諸生先生其季子也少儻穎異書過目輒能聞解名宿耆儒咸謂掇高科如拾芥乃年甫弱冠迭遭變故薄田數畝饘粥常不給生計日困不得已棄讀而農賃田耕耨暇則操奇贏之術節衣縮食蓄有餘資始婚於田氏拊擋米鹽具有條理家以小康自是經營擘畫資產日增僉謂先生有志竟成然四五十年艱難辛苦有不可縷數者矣先生祖塋歲久傾圮獨力修治勒石鐫碑不以諉族黨於族黨秀者勸讀書樸者勸治生貧不能婚嫁者周恤其乏不以昭穆既遠視如

朱氏譜順
乾作本源
冠即本源
字疑當從
譜

路人篤志爲善率多類此其尤著者州北三里鹽溪有橋甚隘歲久圯圯先生獨力新之易名古今行者無沮洳患里人俛頌弗衰又大江中有二石竝峙直亘江心長數十丈亦相等形如懶龍春夏洪濤澎湃行舟多覆沒患道光戊戌先生登大耋易俛賜費建鐵桅杆於盤龍山頂以資鎮厭其患亦弭舟旅至今賴之庚子歲旱先生出粟貸賑多所全活卽此數事先生之爲人可概見矣性至儉樸一敝裘衣至十餘年飲食起居竟如寒素生平嗜學晚年尤篤猶日覽經史子籍數過稍暇則凝神端坐類有道者氣象恐子孫以奢逸致敗著有訓後箴言歷世約言警戒法言勸勉善言暮年遺囑諸篇不下千餘言語皆肫摯篤實不涉迂腐誠處世之良規治家之模範也公生乾隆戊寅三月沒咸豐辛亥七月享年九十有四葬鮮家溪坎上祖塋左元配田繼配祔皆不及先生壽子二長開國次開陽孫三長鈺次璧次錦今守墓者惟鈺後其餘曾元散處四方不可盡識矣論曰凡財由辛苦而得者視之必重先生拮据成家物力之艱難知之稔矣而博施廣濟毫無吝惜視坐擁厚貲金穴自豪者不高出數等乎

興里采訪員
劉烈休投稿

合川縣志四十五

九 鄉賢四

三

李清榜州西里龍市鎮人讀書無多而孝友性生素有善人之譽母六十時病危氣瀕絕矣清榜焚香禱天願以身代哭泣一晝夜跪不起忽聞母呻吟張目謂清榜曰冥間念汝孝增我壽二紀後果至八十四歲卒舊業白花生理弟清楷用秤偶爾欺人清榜痛責之清楷截指自誓不敢復欺某年臘底渝城花行開來清單催結尾欠漏算銀五十兩清榜清算明白如數給之渝地花幫以是重其人後買花願減其價居積數年由此致富置田產樹價每封銀必加二三錢暗補之曰失業者重可憫也道光間州城建節孝祠經費不濟捐田數十畝以贊成之現有碑記生平刊刻善書救難濟急種種善行不勝枚舉清榜子一清楷子二清榜臨訣囑弟三分其產清楷必欲二之今弟兄歿其子各守先人遺言堅執不決故猶未析爨也世之爭產者可以愧矣

程業修
合州志

蕭一富字榮升州來里國東山人先世楚籍明末來州家少有也六傳至一富父士遵中落及一富乃復振一富爲人端方沈靜其立植直不翹足不搖骹不箕踞盛暑不裸袒專意讀書爲文頗典瞻師友交相俛許試亦屢列前茅卒不獲青其衿乃援例入成均爲捐貢生數試秋闈

卒不得志于有司適士遵老不治事命理家政因廢學焉蕭氏于來里
爲舊家族大人多不盡若于道一富時加教誠往往改行爲善良或以
樸懦被欺侮察其理直亦時爲捍禦之以是無賴縮首人不敢欺他人
或來質是非一經剖斷罔不折服遂以見理明作事勇有備于時久之
被推舉爲里長排難解紛日無暇晷士遵慮其羸軀勞瘁將不克堪卽
引疾辭退而假微貲于戚某爲營運計億則屢中獲利倍蓰前後買田
若干畝置龍鳳場街房若干間歲收其租足給衣食駸駸復舊業矣某
年兄一容歿遺子永松永柏俱幼嫂何泣不可仰一富婉辭勸諭毅然
以全節撫孤爲任嫂何遂青年守志以終其身二子亦並成立今永松
永柏子孫談及先世家事猶俛一富不置也道光十年病卒年六十八
舉人王必成爲作家傳茲撮序之如此

蕭氏族譜

吳元奎字東峯號香國州東里渭子溪人性端直不委誣隨人然外渾
融無圭角初晉接若和易可親干以非義乃毅然有守凜乎其不可犯
蓋和而能介其天性固然也道光中入州庠旋補廩膳生員家中資
以授徒自給率先器識而後文藝不徒以科舉帖括爲長然其時文實

合川縣志卷四十五

鄉賢四

三

工廩生劉學榜黃

彭光弟皆其高第弟子也元奎既有資望于學

界因聞岳池僧覺鑑有興學意遽親往伏虎寺說之覺鑑慨然以一千
八百金畀州紳張淑庵爲買田作基本遂勸建瑞峯鄉校于渭溪場之
施茶灣元奎爲文紀之又倡修吳氏族譜未久而成邦族皆相嘆服咸
豐紀元例舉孝廉方正州人卽以元奎應詔二年報可甫經州府驗看
將至省未行而病作歸卒于家年六十餘

東里采訪員投稿

張志大字廷宣號巒坡州東里宗聖寺人父天倫初無子娶妾周生志
大及弟志伊庭幃之間怡怡如也志大少讀書能爲文天倫頗殷望之
令從舉人彭光祥吳式誠遊甚見知賞而試童軍乃不得意猶孜孜圖
進取會志伊天死志大赴渝試值大水險甚念親老丁單不當以父母
之遺體行殆請于天倫不應試許之由是奉親在家專意溫清定省等
事依依色養無須臾離而天倫性瀟灑喜殖花木飼魚鳥客至則相與
留賞杯酒盤飧永日夕不厭志大先意承志酒鎗茶竈位置攸宜廚傳
牀幃供張夙具凡意所欲需無不咄嗟立辦竟可以作倉卒主人天倫
顧而樂之自以爲有子及天倫卒泣血哀毀茹素終喪奉事二親禮尤

周至每有出入雖數里十數里一半日間必請命可否如期而歸歸則道其所見及新聞以爲笑樂無事團聚夜談家常瑣事至宵漏盡親倦欲眠爲安置被褥視宜適定乃休或陰雨鬱蒸意有不快輒取古今善文小說笑林等書演說一二事以適其情務得當而止有姊適黃妹適楊家皆中落志大視同兄弟歲時餽遺相續于路用間不繼亦以金錢資之有婚嫁輒辦粧暖房與子女等二母心爲大憫晚年母周病廢轉側須人志大日親扶掖手自進食下至便溲浣滌皆躬任無憚或有他故出則其妻粟爲之番迭更代如是者可十年以爲常後二母歿並如父喪故事時傅其孝然性至節儉自奉親外飲食衣服賓客應酬一從省約餘無絲毫浪費故自當家至爲諸子析炊前後將四十年買田六百餘碩贏其舊三之二皆齒積所得無非分不義財也顧於義所當爲卽破費不吝嘗廬州城某店見以廢書版支牀問其故則某書賈以抵債今書賈死版無用因賤視之遽出錢數十千盡買而投諸江俾不受踐踏亦示無私利焉從兄志鵬早卒遺孤學成尙幼志鵬妻徐撫之苦無人治家請志大爲之經理志大悉心規畫歲出入有常程不十年學

合川縣志卷四十五

鄉賢四

三

成完婚以家還之增買田穀百數十石餘斗粟尺布皆按籍可稽無針孔不符者學成感之事以父禮終其身族子某某欲售其房祖遺祀田召而責之以無錢對卽各畀以數金得暫止後金盡仍售去不使志大知恐再阻撓也旣而皆絕無嗣志大常舉以爲誡其他捨藥施茶修橋補路諸善舉多不勝書略之光緒九年卒年八十子四孫海洲國子監典簿曾孫家驥家駿四川民立實業中學堂畢業生志大爲森楷先曾祖小功服弟森楷則其免服族孫也同治五年森楷失怙猶讀書獅灘場又一年貧不能支將廢學矣公聞而憐之召往問所業知能屬對卽以十齡童子四字命對森楷隨口以百歲老人對之公喜其敏又適值其壽筵有祝嘏意謂有心思卽留讀其家凡八年游泮飲食修脯試費摯儀皆自之出又二年乃負笈成都去綜計十年可費金二百許而森楷半生所得聲名權利皆基于此其諸木之本水之源與所恨森楷文質靡底垂白無所成清光緒末以蠶學報最獻所製連動縑絲車合格農工商部爲照章請獎三等商勳四品頂戴時擬爲請馳封以非實任無覃恩議格不行未幾國變遂罷嘗爲撰墓誌銘一首交其曾孫家

駿上石未刻而佚藁亦無存今其墓猶豐碑沒字草芊芊也不森楷之責其誰責乎坐是之故謂其能識森楷于微爲風塵具眼而所得止此未免有傷知人之明則甯謂其恤寡矜孤爲好行其德之一端予責其庶可少紓邪要之此三千六百日中森楷不死會當彌此缺陷耳

東里采訪
員投稿森楷附記

李振甲字玉成州西里雲門鎮人蔣璧方編修未貴時爲作李翁傳曰夫人存心之厚薄其不係乎處境之亨屯也明矣世有坐擁倉箱不惟不分所餘以濟人乃又賸削貧弱以益厚其私親族不相往還者多矣而家無斗儲者反惻然於惴獨之哀時罄已所有周人之急舉富人不肯爲者坦然爲之其度量相越何可以由旬計哉吾鄉李翁者家故不豐操商賈以業衣食嘗西達果利東抵漢陽歸裝纍纍家用小康伯叔兄弟及姊妹行之貧不能爨者咸取給焉又相其子弟之材器貸以本貲俾權子母雖自奉甚薄爲義獨勇不數年間諸託庇蔭者各有贏餘而翁牀頭金盡矣咸豐乙卯大旱米價高騰翁適貸族人金販穀自己河歸有勸稍延旬時利當十倍翁曰富人皆有穀可食其市吾升勺以

合川縣志卷四十五

鄉賢四

十四

供朝夕者皆貧民耳奈何以錐刀末利望諸嗷嗷待哺者乎遂以平價售之此足見翁之存心矣晚年益空匱又骨肉相讒前受恩者亦隨俗炎涼白眼相向翁一無怨嫌惟勉兒輩誦讀稍慰遲暮未幾長男彤第補弟子員及李藍煽氛挈家徙避難已貧不可支族中子女之無歸者猶展轉而相隨焉而翁卒奇窮以卒年六十有一竊嘆翁之處境常屯存心常厚爲不可及乃其存心益厚處境益屯爲尤不可測也彤第字昭廷與余交且二十年數奇而有守每見則以遠大相勸謂翁之蓄積者厚不可無以承之也使天佑善人其有鬱而不發者乎彤第後以歲貢生終家亦無起色或者生計實拙不能歸咎于天不福善也

見所見齋文鈔

森楷附記

能以文字景龍州永里南漕人父金璽自有傳金璽歿時年十二母劉痛不欲生祖均德老且病聞之增劇弟妹惟嚶嚶泣一門愁慘勢難終日以文入則強顏慰解以寬尊幼之懷出則拜託族親爲營喪葬具呈報有條不紊老成弗如時人皆以金璽有子咸驚異之然亦由是遂廢學矣而卒發名成業有聞于時以知六經之表十室之內固自有人在

也以文既歿江北歲貢劉煌爲其家傳曰公性孝友少時課弟元吉讀或怠縱暗勸誡之不欲而斥其非以傷母意元吉亦感面率教焉少長鑒鄉善公曩禍鄉善公傳其父金璽也詳金璽傳務爲和平謙退不欲以危言危行博能名有忤凌者輒受之雖橫逆不與校旣而晦迹農圃淡泊自甘若將終身於其間有以防務強任者公曰吾豈忘情者時不可奈何鄉里有紛爭延公公或和顏慰釋或反覆譬曉或助錢和息甚或涕泣告語婉勸曲陳有使人不能不休不可不休之情嘗他邑有鵠蚌相持禍將不測公至數言解如春風噓枯然感者至呼爲東嶽神云然性沈毅有剛斷事有不可稍讓者輒爭之至大體所關如族里戚友間有必須調停不容作壁上觀者亦百計經營務求曲當而止咸同間髮逆煽亂浸及於川東上游當事弗知公所居地扼銅壁要飭公撥丁堵別隘是時公未督團務命弟可權公向當事力爭境遂賴以安江北有鹽私李六李七者匪魁也嘗集眾千餘分抄掠於銅壁間時亦入合界然畏公不敢犯公知其患且大緩難遏別遣人以多金誘之且期賊來時仲夏公預部署團眾於田禾山豆濃密處環而伺賊果率眾來未至公宅而匪首

合川縣志卷四十五

鄉賢四

五

已就縛矣茲二役也公旣以局外閒身能使掀天洪波頃刻就息而載李時邁辛未荒旱公又以蔓難圖爲慮出家貲佐費至耗數百金不辭當時無公連壤不知若何糜爛矣公自恨失學早禮文士有加雖其人年少行不檢亦敬之惟恐不逮有黔士王姓者幕於川不能歸來公所公分屋居其眷視爲弟至數年不衰歸時更爲治裝具遣人自千里外送之臨別黔幕繪圖贈公以誌義其延師課子姪肫肫尊奉之情文爲時所罕見尤愛憐寒畯里中貧不能讀者或助膏火給家費以勵之由是多所成就子二德謙德一公恐其精明而流於刻薄也爲顏所居書屋曰積厚敦厚固高明柔克之意亦其素所畜者厚也孫八人公慕蓉錦名命長孫廷銘詣蓉學川東織造因以興其餘悉因材而教以農工商讀之學嘗謂人曰人不患其多祇患其無業耳晚乃自逃於禪靜放浪烟霞山水閒有從遊赤松之志公旣富而好德而壽已杖朝且矍鑠里人感其行慕其美爲之請耆老於朝報曰可後以壽終子德謙自

有傳

永里采訪員
能明弟來稿

陳孔惠字玉泉州興里人蔣璧方編修未遇時摯友也旣沒璧方爲其

傳曰余弱冠得交玉泉時意氣甚盛罕所許可玉泉亦自負一見投合互相獎藉尋與從劉竹泉師遊余薪水之費仰給於玉泉恬然安之無忤容玉泉亦相待以禮無德色同學二三年別去仍不時借貸濟其困乏旬日不見情意殷殷求諸近今之交遊難哉交十九年而玉泉卒念人如玉泉知交如我兩人烏能默默已於言使其湮沒而無聞也玉泉先世楚人自其祖伯聰長厚善居積起家巨萬沃田千畝玉泉生而富有少儻有大志不安於小就既屢困童子軍奮然思逞於貨殖以見其才及所如不合子母俱損去恆業三之一不足以償夙負益皇然奮發思一得當以蓋前愆遂不謀家人獨至貴州之遵義以賤值多買田產時大軍之後野多露骸荆棘著人輒生癘疾患瘧痢者十有七八玉泉往返至再自信無他率廿餘人偕往耕作乃從者先病以次徧及最後至玉泉久病思歸行至桐梓之新店卒年四十有一玉泉勇健多力喜談兵咸豐十一年藍李逆黨竄合州玉泉徙家清平寨與余隔一江余三十生日見寨上執兵環立坐客疑賊劫急皇皇出觀寨上人亦相向指畫意殊閒甚余笑向客曰此必玉泉限一江水賊蹤密邇不能前來今日未免有情向同列相告語耳問之果然一日持大刀渡宕渠江與余立談沙洲上言賊勢弱且自入絕地安得健兒數輩成此奇功余深壯其言是夕賊攻寨輒登陴指揮使寨中男女各成一隊猝無兵器執長竿爲戈矛環堞拒守賊不敢逼時雲門山屯聚兆人與寨爲犄角余得閒往商謂雖未能渡河殺賊盡先耀武江濱寒賊膽以壯民氣乎適前牧張君銘甫辦團來州亦在山上卽躬率團丁巡視沿江防所賊望見旗幟疑官兵大至夜卽逸去他日玉泉相見猶以失此一機爲恨後以練團事與曾姓結訟余致書切諫玉泉回書怒罵謂爲曾氏作說客耳旬日見之間書猶存否云尙存笥中余曰幸勿棄去閱日氣平再取觀之則知其言忠而意摯矣玉泉笑弗應訟亦旋解讀書文翁石室以捐貢入闈弗售益自放廢連取二姬未及期年又都遣去其豁達不羈如此嘗酒酣耳熱縱談天下事達旦弗倦微勸以稍斂鋒鏑則拂然曰今日之事不得一二英傑擔當宇宙豈從容唯諾者所能辦耶然卒以志氣豪邁弗自降損一不如意則頽然沮喪不可聊耐或激烈太過一往直前義不反顧在大壯之上六羝羊觸藩不能退不能遂其玉泉

播州之謂乎願其交友信待人厚處父子兄弟夫婦閒皆秩然有禮死之日產業已喪其半妻子無怨言親若友分其餘潤以供朝夕者或間有致小康田業數處儼耕者有贏餘可想見其爲人矣使不耽勞履險過自摧折藉祖父遺業弗謀衣食以其閒暇博觀古人事跡以擴其進取之懷而平其拂鬱之氣吾安能量玉泉之所至哉玉泉原配鄧氏生子二人長鴻生亦卒於遵義次鍾生女四人其季女許字三男鴻燾玉泉故後所聘也論曰使玉泉早掇科第回翔廟堂充其英偉之氣必克有所樹立然稍不得君盛氣以往百折不回直驚之禍將不旋踵則考終牖下抑其幸而不遇者然哉獨是鄉里富人率皆以賸削爲能享厚福而登上壽者多矣以玉泉行事若彼獲報若此奚以勸世之聚而能散者乎故吾於玉泉益疑天道云此璧方同治己巳年作時方以舉人爲合宗書院山長也

見所見齋文鈔森楷附記

陳詡字書堂譜名開秦州西里金紫沱人陳氏世籍貴州清康熙中來合累代業農無所知名至其祖紹虞始以詩書傳家及父簾軒並積學未售至兄蕊堂乃入郡庠食廩餼詡亦受知楊秉璋督學爲州庠

合川縣志卷四十五

鄉賢四

毛

生年四十矣既久困小試比戰秋闈又連不得志于有司乃援例附貢生非其志也然遂刻意課子弟讀窮年矻矻期于有成久之子雲遠中遠相繼入學爲諸生有時名因以家塾之任付之而已不復與講授惟時時稽其功課恐或卽怠荒致廢事則以其家三房子姪孫曾輩近四十人詡視之有親疏無厚薄處處關心若痛癢之切于肌膚不能因塾課有託竟一切置之不問也詡性嚴重寡言笑子弟有過厲辭詰責雖年長不少貸其有善行亦爲稱道之故能使人畏服同舉數十年一無異言初詡母早卒繼母某待之有恩詡事之如母見偁孝謹及父母歿季父猶存詡移其事父者以事季父移其事繼母者以事叔母初不敢有幾微失後季父迻居距其家二里所每日必就問起居無閒寒暑如是者十餘年與兄蕊堂相愛異常追隨數十年無幾微間隔季弟生不同母詡愛之逾胞憐其早逝爲經營後事甚備事寡嫂有禮待弟婦有恩於其孤子皆撫而教之並能成立後各以克家聞由詡力也詡于外事無所干而族中之事知必言言必盡有大事必諮詡乃行盤錯糾紛待詡以了者甚眾尤喜施與鄉里窮民寒賤

向之有求輒得其意而去故其壽考人皆稱願之年八十餘無疾而終
子雲達自有傳餘見士族譜西里采訪員來稿

蕭碧鈺字蘊山州城內人其祖益宗自江西廬陵來合貿絲於梓橋街
貨殖多能億則屢中家遂以起碧鈺性孝友事父母先意承志終身歡
然待兄弟尤友愛自幼迄壯和藹相處初無一事一語競爭其父用康
顧而樂之以爲兄弟既翁父母其順古人不我欺也碧鈺初以讀書能
文奮欲自致青雲之上而橐筆就試輒爲有司所黜落未嘗一得意遂
棄去仍理舊業就班按部條理井然值咸同之間滇匪竄擾土賊滋起
州官議辦城鄉團練聞碧鈺才飭辦東城團務守城防隘况瘁不辭南
津街之役從州官登城發礮尤著勞勩賊退上守禦功賞六品頂戴辭
不受尋與吳宗泰同修三峽石路及萬利橋始終不懈工成行人便之
皆嘖嘖稱宗泰不知有碧鈺碧鈺亦初不自言也光緒中卒年七十八
子望崧自有傳興里采訪員來稿

鄭一桂字馥亭州來里尖山場人幼讀書能文道光中應童子試不售
改習弓馬入州庠爲武生而結習未除仍時涉獵書史喜與文人親近

合川縣志卷四十五 鄉賢四

三

性孝友父早故竭力事母以色養得歡心弟大俊天遺孤幼弱弟婦易
痛不欲生一桂遣人婉勸自任撫孤全節易乃收淚拜謝卒爲養教成
立代完婚嫁並請旌表一如初言及後分爨一切平均獨任供母之費
不以派及從子而膳潔裘輕與未分時無異先意承志又有加焉母心
大安時年已八旬後復齒落重生又十餘年乃終固秉賦之異人亦一
桂所以事之者得其道也滇匪之擾合境震驚一桂倡修明遠峯首捐
巨金爲導眾感其意踴躍繼續峯工告成公推一桂爲首主筦峯務因
卽訓練團勇督率守隘多設方略爲捍衛計賊過不敢抄掠而去事聞
川東道上請賞給六品軍功是時汛廳兩署例子每歲各點鄉團一次
應有夫馬派由幾微攤認瑣碎煩擾鄉人苦之一桂察知場有斗口雜
亂無章初無實濟乃興設惠民局以斗口提入爲之基本尋買街房數間
收租錢若干爲點團夫馬之用由局開支不復攤派人以爲便光緒六
年知州華國英奉總督札按派積穀雷厲風行人無敢與枝梧事以大
集然用意過當亦不無小小擾累故多面從而腹誹之獨尖山場實按
戶糧多寡照章派認無溢無遺旋度地構材建積穀倉于阜陵寺工堅

料實至今賴之得一桂之力居多一桂又筦觀音寺社穀收發所餘悉歸公有一無所私談者尤豔稱焉一桂課子弟嚴子官周肄業合宗書院官私課皆有聲童試亦數前列迄不得僑仍以弓馬遊覺賀客多譽其能繼志一桂殊不謂然或乃言其先墓未有文峯祇鞍馬略具形似故發武不發文何能望以詩書起家不如世執舊業或當將門有將也一桂猶終欲以人定勝天但苦于無可致力亦姑聽之而已晚年孫汝良春藻皆能讀一桂盼之甚切並以重金遣就外傳諳囑其善體尊師重道之心每自館歸來輒督令背誦其師所改作詩文不許譌謬則加以夏楚無少貸二孫知其意益專心擊究改課逾於所授讀者後遂皆能上口無遺誤一桂喜獎資有加自後月夕花晨茶餘酒後往往見一桂攜其二孫抽背詩文聲琅琅出戶牖也後汝良春藻先後以文童入泮一桂猶及見之光緒十六年卒年七十七餘見土族譜與里采訪員投稿符文廣字合一州東里渭子溪人性至孝因孀母楊嬰目疾久不愈遽去儒而醫精擊脈經之學母目既痊文廣亦遂以醫名爲人療病多不受幣貧者轉出錢助藥資尤好矜孤恤寡里有黃鄧氏貧欲再醮文廣

合川縣志卷四十五 鄉賢四

完

惠顧提攜近已成家宅近石泉寺年久頽毀文廣以爲不予修復則歲時伏臘走集無所遽倡首補修之頓復舊觀更自捐田土數十畝以助焚獻今就設國民學校于中遠近咸利賴焉初娶楊生子不育楊亦早卒繼娶孫生子四占春最知名占春字長青號佐卿原名昌柏文廣長子也少好學肄業渝城寄宿曾子廟有少女夜奔就之拒不納弱冠試童子軍屢列前茅卒不售改習武精拳棒恥與諸武童列遂不試而歸性孝友善事厥父母養之以禮母歿弟大者九歲小者甫生皆賴占春教育成立最謹交遊非篤行之士弗與通聲氣或有急向求亦量力濟之清末變法投身團防訓習所畢業捐府經歷改習警察歸署合川警察巡官警規肅然人望甚重嘗憂天下無道世必大亂渝合爲人必爭地非可久居乃約同志創辦樂屏墾社爲國殖民並預爲他日退隱地惜方有端緒而不及見其成也宣統初以疾終于警官年三十餘東里采訪員劉有融投稿

易光煥字有堂州來里木蓮鋪人光緒末湘潭黎承禮知合州爲其傳曰君世擁貲慷慨好義父德軒公兄弟四德軒公不問家人生產析箸

時公年未冠已能自樹立代理家政卓然如成人咸豐中滇匪擾攘肆殺掠公思驚兩親豫徙避渝城賊遁乃返其先意承志類如此平時躬侍左右能得歡心強壯有孺慕之容居喪尤能盡禮從父肇濼歿無子眾議以其天心橋私產分與公公曰從父無子有宜爲之後者爲之後義也無而利其產義歟以利害義吾不爲也堅拒不受族請改爲宗祠田奉春秋祀事卒以從舅吉安照黎嗣焉易氏族據半邊山麓滇匪之擾境也鄉族謀依險防堵公謂聚族於斯不竭力圖之族將滅遂捐數百金爲擴土石工及儲器械精食費持久不置鄉族安堵至今父老尙指半邊山故壘告子弟曰此滇匪時易公防衛鄉族地也易族建築宗祠以訟傷財工弗竟兩蝕霜裂基礎將壞公毅然曰是吾責也遂糾族募貲事賴以成兼益後觀歲祀永延多公力也公晚隱居來佛山下抱琴理操有巍巍乎志在高山之風好撫古篆隸旁及行楷尤善章草點畫入工閒嘗以此誘誨後進對賓客校弈終日不倦嗜黃老家言慕辟穀游仙之爲年六十有一卒遺命禁用浮屠說妻陳宜人以賢聞子三長顯珍附生湖南法政最優等畢業寶慶府經歷次顯燭三顯榮均克

合川縣志卷四十五

鄉賢四

三

紹其家有聞於時論曰光緒中余權牧蜀之合州州人易生顯珍從余遊余嘉其楷書有古致既見其篆隸均雅詢所從師珍曰少時家父教珍兄弟如此家父晚年最嗜古篆隸楷行草諸書閒持示余余見而奇之珍並爲余言其父古義爲之作傳殆可以風與

來里采訪員莫致中投稿易氏族譜

向思權字林和州來里尖山場人讀書無多而孝友性生洞明大義年十三失怙哀毀骨立事母李氏先意承志務博懽心事諸兄如父事事必請命而行及析產日思權念仲兄思誠生齒繁應得好田廬慨然推讓之甘受其荒頓者兄與以金不受浸至貧困無怨言四兄思道早卒遺孤女二思權善視之遣嫁如已出其母嘗曰吾兒居心行事篤厚如此後世其必昌矣已而果以勤儉起家其諸兄漸有貧者思權復周恤之他族人類是思權雖不學而篤好文士尤重蒙師擇必嚴禮必厚數十年優禮如初嘗曰師與君親並重吾身智愚成敗係焉曷可忽也子仲才先後從庠生向仲鼎向仲矩廩生劉仁周孝廉劉竹泉遊每歲餽禮惟謹與人交然諾不苟取與不欺里有王文義者償思權錢誤益十千思權立還之鄉黨以是服其直道有爭競思權至輒解不解者兩端

勸息務解而後已思權相貌威嚴言語切直雅不喜浮囂輕薄之士每
姻黨會集常以倫常因果規勸人見子弟衣冠詭異行爲乖僻者必痛
斥之雖至親不避也晚年尤喜看善書見義必爲凡造橋修路矜孤恤
嫠賑荒救饑濟人利物之舉靡不勉力樂行至老不倦享年八十四歲
而卒四方赴弔者盈門咸哀慟焉

興里采訪員
向華國來稿

周鳳鳴字理齋原名順文字繩武州東里黑天池人積學能文累應童
試不售援例以國學預鄉薦亦不得志于有司乃絕意功名居家奉母
舉禮所載孝子事親之儀如冬溫夏清昏定晨省出告反面諸小節及
先意承志視形聽聲和顏愉色諸精微凡孝事所應有者鳳鳴無不委
曲詳盡終身以之故當時稱孝人不閒于其父母昆弟之言也性端直
不屈曲隨人被推擇爲太和場鄉總辭不獲始任事一意排解有以鼠
牙雀角投理者必委婉調停期無訟爭乃已其惡少頑劣作奸犯科害
馬亂羣之事則亦破除情面呈請法治不貸故鄉人敬而畏之或不若
于道輒曰甯受官刑勿爲周君唾棄將不齒人類矣平生好施與貧乏
族戚有向假貸雖不能盡如其意必有所應酬無徒托空言者若年少

合川縣志卷四十五

鄉賢四

三

有才尤愛憐之其族子文生光遠光清族孫泰淦先皆貧不能讀得鳳
鳴仗助膏火恣令遊學乃克成立後每與人言猶謂非鳳鳴之力不臻
此也咸豐末年滇匪擾境謠言滋起內漕數百戶無所于避人意洶洶
鳳鳴首出巨金倡修三元寨數月工竣來者滋益多例出城工他寨或
按籍取盈鳳鳴隨所宜適不任意苛索人皆以爲賢光緒初蔣璧方編
修自京歸痛除局蠹去久舊局士以鄉里衿糧有聲望無習氣者充之
鳳鳴首膺其選筦理三費兢兢自守局弊爲清尋常不入公衙尤不關
說私事大有澹臺非公不至之風當時慶得人焉屆滿辭歸念平生所
負職責莫大于承先啟後而周氏祠堂未建譜牒未修不無遺憾願族
中貧多富少率錢殊艱自擬獨修又覺事體重大倉卒無以應付乃召
集附近木石泥工約以祠堂規樞若何一年立範圍基礎二年定間架
三四五年裝修修完落成未落成前若輩無事來此作工工價照給他
處有事則去事畢仍來予不克期汝輩亦可自便要于不費事無廢事
而已于汝意云何眾皆以爲可遂如其言之凡八年工畢竣宇雕牆
侈侈隆富估價可六七千金實用乃僅半之則經濟道得焉耳其他規

畫大率類此族譜亦所自爲未刊行而卒年七十二光緒二十一年也子臣早死臣聘妻余自有傳時同族以行誼稱者有鳳鳴族子應文字光斗亦黑天池人幼孤爲叔父撫養成立遂事叔父如父終身無異年十六學醫藥肆見藥多僞代嘆曰藥治病草也如此欺冒人不死于病將死于藥矣是可以褰裳就乎遂謝去足跡不入城市嘗見有牽牛過者問其所往以屠肆對應文惻然遽借錢十千贖歸而畜于家後牛死埋之夜聞犬吠輒起視恐有人盜其肉也蓋必行其志如此鄉中有人將溺女應文聞之與以穀五斗使復收養或笑之曰汝冬暖而兒號寒年豐而妻啼饑不知慮此乃救人爲何不厭事也答曰我能救人天豈不救我乎卒無所悔後將終之前夕夢人以金貼其身曰上帝召汝及醒呼子泰淫謂之曰我壽數將盡喪事稱家有無汝好自爲之言已而逝實未嘗有疾也年六十四人咸異焉泰淫見士族譜東里采訪員投稿

楊鍾玲字松山州西里龍市鎮人父澤霖邃于醫造診者弗取摯所庇滋多家故儉益之以博濟遂中落至鍾玲乃復振以光緒八年卒後二十年定遠舉人李樹春爲其墓誌銘曰公少靈敏日讀下數行有鳳兮

合川縣志卷四十五

鄉賢四

三

之目以兄蚤逝封翁且老思久浸貧無以爲禮也迺廢儒而賈居距龍鎮才半里許公賃廡爲貯貨地遂販草綿于巴楚間權待鬻以時歲獵恆不貲於是殖田原構別墅若干楹周以花木盛夏時方諸重頓蓋飫之也公感然曰吾爲此敢以靡鬪哉祇藉博堂上歡云爾比奉封翁諱殮殯一遵古喪儀事母孝弟三委曲將意偶有情竄身率之使感有漢萬石君遺意率悔悟無稍詬詈貽母憂今四世同堂何其懿也公持已素介至應物則濟之以和族戚交游及與互市者見輒自醉初不覺其棘棘抑何粹也尤好施予力所得逮者逮之力所不得逮者以心逮之則公之補敝救偏抑又何偉與然卒因焦勞過節年三十九終於正寢公先援例入成均生子三鳴鸞鳴岐鳴聲鳴聲榜名佐清茂才也能詩古文詞旣葬之念載佐清游庠樹春適通姻於其宗晤之固知其必有得也已而出公行狀屬樹春壽諸石備悉其概如此

因銘之曰龍市之陽緯以華銀碧玉深深下

有達人繫維公生少慧能讀似范希文分釐畫粥公曰駭哉經豈菑畚不賈不倍奚慰厥閭空拳搏戰因怯錢荒繆居怡怡樊室洞張車黍菽歡芸蘭友善嗟嗟我公兮勛業未終天風吹斷宰如華表龜趺辟邪我爲闡之飴邪不邪樹春字厚庵光緒二十年甲午科鄉榜選諮議局議員還充本縣保衛團團總民國二年爲匪戕于樂善場以死

楊氏族譜
森楷附記

梁權愷字端甫號雨辰州東里石子山人性仁孝逮事祖母以順謹聞母李故廣西巡道亨時公會孫女也性嚴厲號難事權愷奉之得其歡心年八十餘患中風起居不良權愷翼之溲溺三年如一起居飲食非權愷不適或欲代爲之則曰勿亟待權愷來而權愷亦不能須臾離嘗有同里富翁李某具重金延權愷課讀其家竟堅辭不往者以此權愷故身瘠多病有星士相不壽權愷憂之後讀書得袁了凡立命篇遂一心爲善凡里黨族戚紛難力爲排解雖貼費食弗吝與人語士則談義理農工商賈則說善惡因果嘗言曰我輩不能以錢爲善可以言爲

合川縣志卷四十五

鄉賢四

三

善同治某年六月院試水沒州隄同友四人買舟赴渝開程數里舵楫皆折欲登岸不得且日暮任舟漂泊驚濤駭浪中僉謂無生理矣久之舟復定皓月東出起視直抵臨江門岸皆欣然曰此殆公之善行所致邪權愷由是信善彌篤中歲課徒于家詩文必根據經史尤重德行教授分兩班甲班年長讀朱子小學乙班年稚讀三聖經嘗迪之曰此書做人樣子爲人如是其庶幾乎從遊因之益盛頗有所裁成里父老嘗相頌曰端甫先生不誤人子弟梁氏始祖入川譜牒失傳族眾議修權愷先捐金若干爲之倡其閒家規條例編輯記載筆削詳畧督工數十日親任怨勞竣事基速族人咸稱之繼復擬建宗祠商及其父斌士倡捐百餘金族眾亦踴躍得購業若干畝爲之基礎及祠宇落成闔族皆曰祠非公不就也合邑地濱三江麗治數十里業河土者必來城運糞作肥料屢與船戶糾葛彼此患之權愷爲請立案擬章程作記刊碑川主廟命名曰力農會羣皆僦便釣魚城經滇逆後女牆城樓盡圯權愷於光緒戊戌倡首修葺雉堞一新權愷處世謙和待人渾厚人樂與近晚年喜樹藝種植得法居所初濯濯數年成叢林獲厚利支孫甚眾日

督孫荷鋤操林下業杖履優遊杜絕萬緣翊翊如也年七十三無疾而終出柩之日弔者咸相謂曰世人盡是梁端甫天下衙門不用官卽此二語可想見其生平矣此權愷家傳之詞也問之石子山人云信東里訪稿

苟汝光字繼華號輝山州西里白沙場人太學生文炎曾孫也文炎自有傳汝光生性孝友父鍾泰早歿事孀母文偁能順謹弟汝寬時未及歲念俱讀書則無以贍家乃盡棄所學習質渝城初年薪俸無幾盡寄以供母文甘旨及弟修脯之資而已無所私利比與同學友夥質利生厚號歲入較豐所寄亦差多初未嘗浪費分釐用其所不應用然交朋友重然諾有寄託以事或購置物貨必盡力治辦精心選擇必不使絲毫有負有古烈士田甲之風以故一時名士如趙編修熙何教授榮楠杜大令成章戴明府光皆知重之森楷且與訂蘭交焉而尤以王瑞生爲最瑞生巴縣人故以商起家欲歸老于鄉而一時未得替人因循不果及與汝光接知其行能遽以瑞生乾號事付託汝光瑞生弟及子姪皆聽汝光調度汝光自歲俸外年分紅息十分之二而汝光實未持一錢往世俗所謂乾二成也汝光既感激知遇卽聯絡京省蘇滬粵鄂

合川縣志卷四十五 鄉賢四

五

滇黔諸友人聲應氣求消息通靈每有貴賤之徵輒先察得電告因而販運所至無不三倍贏饒四五年間獲利巨萬遂以聲聞波發江海知名駸駸宏規大起矣而用心過甚日漸羸瘠光緒二十六年病作明年終于家年四十四拔貢李遂根爲銘其墓有不仕于朝而隱于市博誥顯親豪傑之士不虛美也子樹藩弟汝寬並具士族譜西里采訪員來稿森楷附記李德厚字敦甫捐名郁州東里獅灘場大鼇溪人曾祖天舉自有傳德厚子柱爲其先考行述曰嗚呼天罰小子六歲而孤不及識先府君行事族黨尊宿及先母每爲言其梗概今追述焉先府君生周家灣三歲隨大父母辟賊葛家巖事平乃居今墅時年尙孺其體清羸其目瑩澈其語軒豁其行簡諒先大父鍾愛之洎長長身峻貌性宏毅而意溫和言論威儀造次必軌于正外曾大父劉竹泉孝廉特見賞重攜之瑞山書院使與諸舅樾階秋帆齒未嘗有愧撓色竹泉謂此兒深沈殆不可測偉器也留年餘歸援例國子監生方擬爲制舉業會先伯卒先大父謂府君曰死者已矣存者奄然我老厭事汝適次之當爲我分勞安能久事筆硯閒乎府君不敢違乃輟學是時兵燹之後風氣尙武少年多

以裘馬相夸耀府君被服儒者身未嘗帛襦袴人不能強之同家事殷繁簿書鞅掌多無暇復問書史府君偶有餘閒輒端坐讀書如老博士人亦不能禁其異居恆蚤起理弟子職已卽周視林塘蔬作或靜觀古圖畫以自娛暇日率諸弟習禮儀或課督兒曹以灑掃應對之節不率則揭荆垂規模于庭俾知警省無貽父母以羞辱也諸兄旣歿徧營其壟仍課遺孤讀不懈至各成立始已二老壽日來賓無多少必陪候周到應須服用藥物先時爲備應呼而至無少歉缺先大父稱之曰能大父母族黨有貧不自存啟口假貸必量推恩澤不徒托空言或少年失學則往往墀入家塾至二三年乃去以父母之所好亦好之也其輕薄子弟游學好閒不事生業徒以游蕩奢淫轉相誘惑則謝不招待乃至屏逐絕之以父母之所惡亦惡之也至吉凶慶弔必呼弟姪同往每酒酣耳熱情意肫摯和氣盎然有銛與賭拳猜枚則不應旣厭喧呶又恐醉失儀耳蓋自尊重如此光緒十二年贈公中風四支緩不舉府君翼身和藥至承澣穢之事皆躬任弗嫌久之漸愈明年復作後遂閒接相續不良于行甚乃舌本強便液污染府君屏營其側未嘗假手婢僕

合川縣志卷四十五

鄉賢四

三

亦初不覺其勞大凡贈公願爲之事無不先爲之所不待聞命始籌措也贈公意大安家人化之皆相與服事爲樂而府君之衣帶乃日趨其緩矣廿年贈公又寢疾府君思所以永甯者不得繞室徬徨竟夕不寐如是數日遂病明年疾竟不起年三十八烏虜哀哉此其子柱之詞也原文少冗爲節存之

東里采訪員
李春帆投稿

補遺

易安庭字正閣州來里大河壩人甫周晬失母繼母宋撫育成立甚有恩意安庭因孝事之終身無閒友愛其異母弟如所生臨當分財不計多寡恐一校量失母意也後兩弟歿撫其遺孤逾于己子爲營贖產業備極艱苦無幾微德色人以爲難性剛直不能容人過或面折之然遇人有爭又必多方勸解無事乃已鄉里咸欽服焉後卒子玉振玉顯皆能承其門業玉振字金聲初試童子軍不利乃佐父理家政從父安藩安世故遺孤子三安庭善視之玉振承其意一體經營卒成先志嘗有人竊其竹者佃人執以告玉振見之曰是非昨來乞竹者邪但一時忘告汝輩耳遂釋其人令持竹去其餘事多類此玉顯字金揚生性沈毅持身勤儉晨夕躬親灑掃夜必點檢門戶一如朱柏廬言初受祖遺田四百畝季年乃四倍之中遭父喪哀毀骨立承歡慈幃體量倍至終身無違忤色族鄰有紛爭者得其一言無不立解生平嫉惡如仇然能改則止不爲己甚鄉人敬而愛之以爲有父風云

易氏族譜

潘世楨字永忠西里官渡場人道光二十年卒年八十三舉人劉泰呂

合川縣志卷四十五

鄉賢四

美

爲其墓誌曰渠江蓉溪之上有草坪潘氏故家在焉卽永忠君發跡處也余嘗館于其家接其言論丰采有古君子風先大父通衡爲人耿介直名遠播厥考文明邑宿儒學邃不售老於家舉五子君其冢嗣也秉性端毅敦古道重然諾言笑不苟毀譽不形人莫測其涯際幼岐嶷出就外傅嶄然露頭角因父酷嗜詩書不問家事遂謝章句之學以服其勞時年逾成童舉動謀爲不啻老成故文明公數十年優遊林泉門祚無憂得君之力爲多潘氏有子矣君篤孝友自先大人下世後奉母粟孺人朝夕承歡養志下撫諸弟以恩凡一家內外事無大小皆裁決於君金友玉昆雖古之荀陳無以加也仲弟永智精明特達自弱冠入成均亦佐理家政和衷共濟宜其家聲丕振超尋常而未有艾也方少壯時勞於稼穡善權子母出入會計無遺策而於取與間義利必辨嘗有稱貸者償踰乎數不自覺君籌算審處仍如數歸之又路拾遺金百餘度此爲某某之物卽持以奉還若人稱謝不已而君無德色其臨財毋苟如此彼世之貪得無厭見利忘義者聞君之風亦可以少愧矣且夫世之起家於微者或家有嚴君爲之主否則手足分析其所積以遺不

過爲子孫謀利耳君則不然親在固以家事自任親沒亦以身爲家人
倡至今四世同居猶未析爨竭生平之勤勞况瘁黜奢崇儉以成巨族
而又不僅遺其子孫並遺諸弟之子孫此其志不可謂不篤其心不可
謂不公且平居不信浮屠無稽之言而建廟塑像成梁闢道無不樂從
蓋人多以施與爲德而君以公直出之人有陰食其利而不知者斯不
言德而德乃大至厚宗族和鄉黨息爭訟訓子姪前此羅君玉亭陳君
曉園兩先生壽言論之已詳茲略不之及云其弟世幹字永智亦有行
誼名後九年禹湛誌其墓曰先生性孝友讀書能見其大小少從師自負
薪米春秋歸佐農事仍不廢讀因家累棄學援例入成均非其志也爲人
剛毅公直遇事敢爲與伯兄同理家政一以恩義相表率故諸父昆弟
無間者數十年丁逾百口猶同爨泊伯兄歿始析居時先生七十有三
目睹五世其富實蓋一鄉然以忠厚世其家戒驕奢尤戒爭訟非緝盜
不入公庭諸子姪延師家塾教之成人別敏鈍命業而所重尤在讀書
爲善不好名困乏者托故賙之歲荒授粟不責報其他義學義地橋路
文會大小善舉期於成而後已復刻孝經小學及他善書送人凡有公

事及不平之私事先生剖之立解人服其公晚年謝絕時務而鄉之大
事必相聞並求一言爲斷卽先生可識矣吾獨異者嘉慶初教匪入州
境人心大恐先生率鄉人築天平砦守之其地與磨盤山相犄角來附
者設法安置不下一二萬人卒無虞當其奉檄領鄉勇過廣安截賊州
刺史龔慮生事止屯城外傳首事謀所以安輯之同輩無一言先生曰
人眾則心不一苟非有所統攝而鼓勵之此不見賊而先自亂者也惟
給領旗以軍功頂戴重其賞罰則眾心固而勇氣自倍刺史用其策而
去來不擾其膽識如此居恆教子孫曰人非讀書莫醫俗亦莫保家孟
子曰富而不教則近於禽獸宜謹誌之勿忘子孫赴試放歸必切責之
曰人患學不成不患無知遇其不利試其學植薄也厥後文武入庠者
已數人皆先生有以刻成之其教家如此胞姊粟寡無依迎養於家旣
歿喪葬從厚以爲不如是不足以慰父母於地下其天性如此噫是可
傳矣竊見今之人擁重貲厚自奉見事避之惟恐不速無非爲惜財計
間有爲公者不爲利未必不爲名初何嘗計及教子讀書哉不轉瞬而
後人棄若泥沙凍餒不免視先生見義必爲名心俱化堂構相承者百

有餘年其得失何相懸萬萬也詰嗣瑩臺茂才與予交予訪瑩臺時得識諸子姪俱恂恂雅飭宅之四圍竹樹蔚然半皆先生手植人問之曰十年樹木百年樹人吾之爲此蓋欲使子孫知起家由勤耳少工書勁健有神七十後時作小楷以自遣八十營宅於桂花塢客來必留飲縱談客醉而飲猶豪先生殆山林中之隱君子歟惜未親聆其緒論也其他及年月詳於行狀中者不贅

潘氏支譜

秦天佑字永豐號寶亭州東里安家溪人嘉慶二十三年年六十舉人張乃孚爲其壽序曰寶亭親家先生明贈都督僉事邦屏公六代孫也原籍江右洪武初遷蜀之忠州迨國朝定鼎始奉旨安插合州居焉四世祖鴻業公中康熙己酉科亞元隱居不仕傳至君父太學生崑山公家已中落然性豪邁不以窮達損其志與先祖先父交好猶憶童時得親杖履依依如昨日君生而狀貌魁梧志器宏敞見者鮮不疑君當以武功起家可以紹美前人班定遠狄襄武直且暮間事耳乃遭崑山公辭世棄儒而賈司太平饒務獨居一人支持門戶衣食於奔走備嘗辛苦不四十年而復振興非其才之有大過人者不及此當居太平時賊匪

合川縣志卷四十五

鄉賢四

三

突至被圍於大寨山月餘圍解始與羅桂二公訂交朝夕談論韜畧相得甚歡時羅桂皆官把總咸勸君假軍功以博官殊亦易易君以母老爲辭今羅桂官至總戎人皆惜之而君不以此介意所謂捧檄色喜賢者均不可以恆情測也後同事火伴從桂剿賊得官君贊成而復飲助之未嘗幾微有德色尤人所難及生性孝友伯兄天德失業恃強君不與較時時周卹之嗣伯母及天德夫婦物故爲買棺厝葬俱從其厚其爲客也途窮乏歸資者爲辦裝以送之舟行遇溺者捐金以拯之其他修橋補路掩骼埋胔見義必爲不一而足私語冢君大恆曰善事爾輩當力行之不必對人言以市美也君之立心如此陰德耳鳴上壽食報非其驗耶德配王孺人幼從宦石砭馬姓外家生百子堂中

百子堂譜作采芝堂疑當

從譜

爲漢馬援裔宣撫使千乘之後于歸後奉翁姑以孝事夫子以敬寬以馭下慈能訓子其在宦所時猶獲拜秦夫人遺像見錦袍玉帶環珮儼然故閨閣師承夙嫻姆訓不失林下風凡君之在外馬蹏雞聲經營貿易得以業肇豐亨無內顧之憂者孺人贊襄之力爲多今夏五月花甲雙周親友爲製錦以張之徵序於孚子與君居同里長同游飲食宴

樂相徵逐者且二十年初謂君豪於待客當廣交游博聲譽乃混迹魚
鹽居城中經年罕見其面類市隱者然而生負奇姿使早偕羅桂以希
榮顯何難與石砭後先比烈顧拂衣歸養親以樂天倫其居心淡泊爲
何如也大恆亦倜儻不凡早歲從予游數試童子不遇買別墅學士山
下讀書其中不入城市其志有足嘉者君之不欲顯其身而欲獲之於
其子者吾知其必有合也大恆勉乎哉以斯言爲稱觴時述之君卽禁
酒必欣然勉進一醵至祝嘏諛詞浮而無當君固厭聽予亦不願以相
溷也是爲序

秦氏族譜點紅
萬錄山房文集

趙仕清字鏡河原名學芳西里泥溪場人少讀書屢試不售道光二年
遵父文煇命援例成均擢擯家政視規意旨無違者性恭謹言笑不苟
家法極嚴閤堂四十餘人不聞嬉笑聲弟兄四已析居每公至猶呼子
弟相戒勿出妄言恐其聽之坐立必端終日無倦容子弟侍側無敢有
倚斜態見者輒敬憚之朔望必沐浴齋戒焚香祀神夜則講善言以警
家人常曰孝者百行之原淫者萬惡之首古昔聖賢誰非先從根本做
起又曰祖父常言爲人不可欺心欺心便折平生福我謹守之爾輩亦

合川縣志卷四十五 鄉賢四

三

慎勿忘此言最重讀書人偶遇必折節下之有以字畫來者務倍償給
喜施予家本中資不肯蓄積視年終所餘罄其有以爲施濟道光二十
五年泥溪火延燒四十餘家貧者不得食施米數石乃獲濟咸豐三年
監修天成砦任勞任怨不私一錢辛酉冬避亂砦上賊未至眾皆下砦
看守屋宇忽賊大至眾奔砦門未開砦內人不肯啟清曰如此多人豈
聽其圍之去啟門闕入門甫閉賊已抵砦下其次子肯堂稍遲被圍不
降與鬪兩賊不能脫中數十傷而死或以相弔仕清亦頗傷之然以禦
侮與汪踦等不戚戚也同治二年泥溪又火延燒五十餘家又施米數
石有尤貧者暗中給錢或四百五百不等又給竹草以便起屋庚午大
水金鎮泥溪全場被淹金鎮施錢二十釧泥溪施錢十釧米一石若遇
凶年必出米以作平糶又曾孫用謙手書正心寶鏡端本要錄兩善書
每年印刷二百部親到各場發送如是者十餘年鄉鄰某借錢壹百釧
還時誤多錢十釧卽命還之其深感焉某存心正大類如此故潘一崙
明經起老人會以爲篤行君子第一晚年尤喜讀書看經終日不倦卒
年八十又八子正義正堂孫曾數十人用修自有傳

西里趙崇
光投稿

陳敬簡字可亭州西城營盤街 人性孝友善交遊自爲諸生時卽以尙
義氣重然諾聞於人人以是歸 州之無間於其父母昆弟之言也道光
十七年丁酉科例行拔貢試敬簡以積資充選入都朝考得小京官籤
分兵部兵部當承平世自侍郎 以下皆無所事事輒以優游養望爲高
敬簡公餘多暇獨作文寫字程 如諸生二年己亥恩科中北闈副榜
明年庚子科登順天鄉試賢書 稍稍有聲京朝間二十五年乙巳恩科
登 榜進士補兵部職方 司主事未幾考試軍機章京以第一名
壓班卽補旋調署武選司日隆 陸上州人入都者輒主其齋而尤與朱
奐善奐假歸出都爲畫小幅題 詩留別有亭畔垂楊三兩筆縮人離恨
萬千條其交情可想歲餘敬簡 卒年四十計聞奐復爲詩哭之云惜君
原不在科名親老家貧事未成 風雨一棺妻子淚雲山萬里弟兄情早
空塵世繁華夢難得鄉人歎息 歸回首都門容易別萍蹤再聚是他生
誠傷之也已聞其家無力歸柩 卽自捐金爲倡更爲啟募葬費云竊惟
冷煖異情死友難於生友扶持 盡力故鄉終勝他鄉誤人豈是詩書一
官潦倒歸里僅存骸骨萬古悲 淒慘目傷心至此極矣仁人君子其能

合川縣志卷四十五 鄉賢四

單

忍乎吾合陳可亭者生有異才 素敦高誼能推心以置腹真瀝膽而披
肝月旦公評非同類互爲標榜 雲程捷步不數年早拾巍科倘使歲月
寬閒歷登清要何難勲猷展布 輝映里閭詎知造物無情書生薄命甫
當壯歲遽作古人奈官况之蕭 條黃金早盡非交遊之慷慨白骨難歸
迢遞關山萬里之魂空返飄搖 風雨一坏之土俱無况值眼前家貧親
老尤憐身後婦寡兒孤不傷惠 豈傷廉願多贈曼卿之麥能利人卽利
己何必焚阮裕之車各伸同里 之情用代生芻之祭共襄盛舉厚賜賻
儀敢告同人特爲公啟州人感 奠之義亦重敬簡之清共釀金若干畀
其家扶柩還葬于興里鋪山埡 之麓兄敬履自有傳 程業修合州志師
竹軒稿森楷記
楊進笏字詔和號輝如州東里 宗聖寺人咸豐五年補州學生同治九
年卒年三十六其弟進蕃爲其 行述曰吾楊氏世籍湖南靖州綏甯縣
康熙五十二年始祖政仁由楚 遷蜀置明東里三滙壩遂家焉高祖諱
通達以季子檐官訓導例封文 林郎曾祖諱光泰祖諱昌哲俱太學生
父恒春名盛桂生子五兄其長 也幼穎悟入小學時塾師授以四子書
閒爲疏解意義卽能領其大畧 曩日嘗語蕃曰予兒時八九歲自塾中

歸輒翻閱家藏說部書父以爲童子無知也不之問旣而與人言則書中事無不了然於口聞者嘆以爲敏父亦色喜至今時復憶之性簡樸誠確勵廉隅寡笑言岸然道貌不喜譁囂終日正襟危坐而篤於學同學常稱之曰篤實君子吾輩不及也兄嘗憤有人勸父令兄廢讀改他業以救貧者因益艱苦磨礪讀輒夜分不寢每日成一藝拂紙吮墨一揮而就不可拘拘文會常期而於其他功課則又無所不到老宿馮作堂師常以大器期之後從堂兄健夫明經遊亦以學有本源不染時趨許其遠到未幾入邑庠時年二十有一進趣銳甚然棘闈屢薦不售貧病交迫未嘗不嘆遭遇多艱也生平飲食不厭粗糲每冬春交室如懸磬多以菜茹佐食兄輒據案大嚼腹爲一飽偶得粒食留以進父母不敢自奉故癯瘠以終其身則後天所虧略等於先天也爲人短小精悍雖弱不勝衣頗負奇氣早歲習少林達摩拳勇並刀鎗陣法一切用以宣通氣血且備亂世之需著禦侮錄一冊存之篋笥歲庚申辛酉吾合賊氛四起震動明里東西居民上砦聞風股栗兄率團勇數十教之臨陣軍火曉以大義日夜巡警砦垣更三四轉兄尙結束衣冠追從數人張

燈履風露中如是月餘不懈孝廉周君峻庵驚相謂曰不意文壇好手兼茲勇畧及事平兄益以見重於鄉里其教人以誠嚴於訓課不主世俗速化之學必以秦漢唐宋及前明諸大家爲根柢而策之以恒館課稍暇則擁書獨坐心氣專一絕去塵氛或取愜心詩古文詞或故事或儒先語莊錄數紙久之疊案二三尺或午夜孤燈手披口誦聲振林壑較諸從學侶爲勤及雞鳴就枕雖寐勿昧怡然湛然醒猶虛明每自念曰孔顏真樂將毋近是而殊恨其境之不可多得也兄於古書無不好尤喜讀昭明文選及聊齋志異手圈點數過並採前輩評論登錄幾滿閒亦自出已見批列簡端皆能別具會心從書縫中看出不作泛泛語尤惇睦本根遇骨肉親支纏綿周至相見以天子弟尤加意裁成己巳歲續修家譜以筆墨事引爲己任參稽攷訂幾費心力更於祖父嘉言懿行及先儒論說取而編次成書用以端家範垂久遠一書之中三致意焉兄故善飲然酒後英氣勃發輒好爭論迥異平日理有未信尊親前亦必力辯不少屈屢自懲之而未克遂戒酒不沾唇更摘書先哲名言揭之壁間有色爲伐性之斧酒是毒腸之藥云凡以自警也嘗謂

人曰醒則猶人醉則多有不似人者且杯中物最耗精力我輩留得精力有如許用處否則精力一殆吾生自此已矣幼穉弱疾常爲二豎所厄憶自前十餘年省試出場吐血數升一病幾危以後漸次就愈偶或一作覺亦不甚可慮近來五六載已健飯無疾終歲可不服藥獨至去歲形容頓瘠精神衰少每慨然曰予讀曹子桓已成老翁但未白頭之語不覺心悸蕃聆之亦以文人感慨之常而不知爲凶兆也五月初旬兄自館歸蕃以鄉科在邇勸之赴省兄以遠教渝城意不欲往延至七月蕃又致書速之兄始辦裝就道時盛暑中行病卽因是起兄初不之覺也復由家到館病乃驟作蕃得信往視力勸兄歸兄恐以己恙貽親憂蕃遂就館中診治凡八日病勢殺大半獨形色黯滯脉氣未轉蕃竊竊慮之然自亦有館難久留分袂時兄切囑蕃回時總以病已全愈對父母蕃漫應之而心擬旬日後遣人視其何狀再爲處分不謂別未三日而病變病危而歸未及家死矣悲夫時同治庚午十月十三日也年三十又六是月二十七日葬老龍洞灌頂峯下丙山壬向綜計兄之前後自五歲就傳讀十五年至乙卯始青其矜踰年設教至去歲庚午又

十五年其閒所獲餉金悉供家費無一私用平居亦毫不齒及惟是日以父失明母多病年俱六旬上下家無一刻不寤親無一刻得安爲有生以來第一恨事對蕃言之數數蕃以爲他日得志承歡有時恨亦可以稍釋也今若此恨曷有極耶所可異者兄病之時猶遣人買紙手錄聖賢實學及先民功過格一本旣終卷遂不復起絕筆之迹有賢子孫當爲心痛也兄平素詩文雜作不自收拾散軼過半今僅存古今文百餘篇詩百餘首名覆瓿瑣錄藏於家嗚呼蕃年十五卽受學於吾兄越五年出就村塾亦復赧顏爲師更十一年依然故我今且三十有一矣辱吾兄期許之殷壯年意氣無所發舒正賴吾兄進而教之而吾兄已歿益漠然無所向矣戚黨中論者每謂伯氏之壘仲氏之篋詩賡同調弟何媿兄嗚呼蕃何以得爲無媿兄之弟哉特是德行文章尚有典型不及今撮合大凡令長者之名久而就湮是則蕃之大媿也夫抑又聞諸父母兄未生之初頗與人異母孕十六月兄始誕焉以故兄平日詩有十六月中艱苦况問心何以報劬勞之句初以爲祥而一生不偶魍魎窺人文章憎命頹唐至於今日年未強仕且以窮困死矣豈亦有未

森楷案忠
良不見存人
法不為立
傳而為吾
州第一不
農是者因
多得者因
破例為其
傳以存其
人据附傳
例應低一
格付手民
時先未成
正及印成
樣本始見
之已無及
矣是吾過
也附識于
此

足為祥者耶葬之日勿論親疏賢否聞之皆為致祭送而嗟悼者無異
辭也先是兄未卒之前一年有人言老龍洞山水之勝甲吾鄉兄往觀
喜甚即卜為生瑩青烏家弗善也兄不為搖及病歸自渝泊龍洞沓
于舟中蕃以龍洞之名與所卜合遂歸于其宅從所志也豈其閒亦有
莫之為而為者與時十年辛未春也是年進蕃遊庠後隱于醫自有傳
進蕃著有鄂不樓待定稿醫學探驪若干卷初撰進蕃傳時未及知既
刻成矣其子忠雯乃以此稿來不及追入為增識于此楊進蕃鄂不樓待定稿
李文華原名大榛以字行西里十二洞橋人初應童試不售援例為太
學生見父迎泰老猶理家政積勞漸衰乃輟讀襄贊壹是迎泰亦以其
有才而持重以家事畀焉文華善量出入尤謹蓋藏前後十餘年增置
田穀至三千餘石而深明大義崇儉好禮督率弟姪輩讀書重修無吝
有不能讀而習弓馬者其勸學亦如之同治初元弟鳳岡從子瓊芳同
案入文武庠子樹榮又入州學旋補增生一時稱極盛焉文華復倡議
修族譜糾合近支及疏宗之在定遠者討究本源窮極支系為合定李
氏宗譜首先捐數百金年餘歲事又倡修本場惠民宮白雲寺橋亭子

合川縣志卷四十五 鄉賢四

墨

及寒衣濟藥橋梁道路義塚木匣諸善舉皆捐巨資助之更以李四興
名置楊柳溝田土一契永為義地立碑以誌閭家數十人一以禮法為
教獨振理大綱不責圭撮小失而尺帛斗粟以上莫不名之無私藏者
故家人咸服其公光緒二十年卒年八十奔喪者數千人或痛哭失聲
其感人可知已鳳岡瓊芳樹榮並見士族譜西里采訪員李德珍投稿
陳忠良西里大士保人李昌運為作老良傳曰戊午春昌運館會君遂
良家有老人夜至共晚食年七十八耳聰目明言辭爽朗會君曰是雄
於貨者手積三十萬錢不置產業而耕人田今尚為吾佃戶也予視其
人若不親耒耜然食頃予督課去聞高談有聲多勸人語天運明起振
衣不倩人扶持歸家殆四十里云予疑之暇與會君談及此會君目坐
客熊某曰子與老良習處當詳其家世請為先生言之坐客年亦老曰老
人陳其姓忠良其名入習呼為老良父某為豬販困於酒生平積錢四
十千佃來里高歇坪山土忠良性至孝童時父為納任氏女作養婦成
配後男耕婦紡各正內外有弟晚出母老乏乳任為乳之弟依任如母
見者不知其為嫂也忠良極誠樸人恆給之歲有餘積使國穀同治甲

子石穀銀十兩得數百金自此家漸裕鄉里率向借貸無不允借後償以低貨如梁麥油餅等類輒昂貴亦不知其所以然庚午辛未河伯爲災從古僅見有種大成會河土借貸忠良作佃資者屢歲無收穫主客相怨以累忠良否則舊債悉化烏有忠良無奈移家去歲財大熟累歲之歉報以一歲之豐也是歲餘千貫今猶耕是業生子七每婚配輒佃田使耕期勿忘農業弟有二子亦與諸子同分每人派錢五百貫不稍異環室而居里許數里可通呼吸其尊人患風症數年食息起居事事躬親衣袴穢褻持向河干洗滌不委妻不委兒孫婦尊人年七十八母少二歲同月卒喪葬如禮馬鬣三尺鄉人稱焉老逾好善談陰騭不絕口鄉里口角集兩造於臨街宅一言立解塾數金數十金數百金常不計期事寢而已子弟使稍讀知禮義然重在耕次子癖於嗜好屢戒不悛逐出仍恤其子使耕嘗曰汝其蓋乃父愆配任慈惠勤儉紡棉爲樂三日紡棉一筋親爲絡繹臨場親爲左樹數十年如一日也每場易棉後兼爲鄉人了不了事事已爲兒輩買食物歸使瓜分有差諸兒曹孫曹及婦孫婦亦輪日來視夫婦奉物爲夫婦壽夫婦視如客幾不知老

合川縣志卷四十五 鄉賢四

聖

之將至也惟次子婦早喪餘俱存男女計十三人男女孫曹五十七人男女曾孫曹七人昇平人瑞此爲近之曾君亦聽其言信而有徵予謂匹夫能享千金才智亦必過人然無不從根本上懋厥脩爲也獨怪辛壬變故古今一大變局富貴之族不安於室亂世多財非福信矣哉若人父子兄弟比屋而居他人所見爲荆棘者已若不知人世有攀蘿捫藤之苦殆桃花源裏人家也予用輯熊君之言作老良傳

編纂員李昌運原稿森楷

案本志除列女外不爲生存人作傳忠良則老農之特出者李君文亦簡淨故破格存之

丁燦緯字叔聯儀隴訓導樹誠第三子也性純謹幼不好弄少長能讀書而樹誠方肄業尊經書院不及教乃以屬湯祖斌文學授章句祖斌性謹飭課讀之暇輒爲講立身制行及人倫道德諸大端燦緯謹受教終其身無越畔祖斌養正之力爲多光緒八九年間樹誠歸掌書院燦緯乃躬趨庭訓朝夕觀摩學詩文皆有法度數歲樹誠謁選京師命隨其兄燦蟾從予于雲峰鄉校予以其名父子又故人兒當不僅僅以科舉文見試課古近體詩及律賦亦詞意清新不同凡豔惟腹笥少儉特撰聲律典麗四卷授之并督及門諸生分注出處爲屬鑿計燦緯所得

獨豐詞筆亦蒸蒸日上樹誠歸自京笑謂予曰大兒學無常師宜多采
擷三兒從君一載勝讀十年何速化也君豈有至寶膏邪予亦諧語報
之曰龍子固自不凡我非能磨磚作鏡也未幾燦蟾燦緯相繼入類竝
有聲譽序閒而燦緯尤樸屬微至精神內斂以樹誠大名鼎鼎常恐貽
譏舛陋爲堂上羞每趨侍之餘輒閉戶自精昕宵無閒久之感寒濕氣
病休息利樹誠憂之禁其苦讀乃休養數年病良已生平溫柔敦厚對
人無疾言厲色內行尤純篤事父母恩禮兼盡繼母性剛嚴侮難事燦
緯獨得其歡心相見未嘗有不豫色卽弟兄先後有逢怒燦緯至一言
立解樹誠心大慰嘗自修家譜于燦緯下注考語云能知孝友非虛譽
也癸卯甲辰之交予辦四川蠶桑公社輟有成效燦緯已補增廣生矣
來社充自費學生滿一期去歸樹桑于家將成林復遣其從子鳳儀鳳
翔來卒業則讀書有得知趨重勞工爲斯世先覺久矣新學稍久敎職
須才燦緯歷充本縣中校國文敎員數年學侶推服甚至兼有經師人
師之名脩脯歲數百串悉供家中公用分文不以自私兄燦蟾卒負累
數千金盡售所應分業不足償債燦緯商諸兄弟出素所蓄積爲之已

合川縣志卷四十五

鄉賢四

吳

責更貨新置街房益之猶餘四百餘金不任將致訟乃以己名易券始
寢然負擔遂寢寢重矣弟婦湯青年守貞例得建坊析產時議及之相
顧無應者燦緯慨然任多金苦無見數則代舉所應負債以當或謂其
可暫緩不計也修志事起聘充編輯員相與共晨夕于東臺山者數月
局撤乃別去八年五月鄒忠介公亭落成相見于雲門鎮貌黑且瘦則
臥病新起神采去舊日遠矣九年二月卒年四十又八居恆爲應酬文
甚夥顧多不自收拾旣歿其子中校畢業生鳳梧抄數首來請甄錄予
爲采其代鄧某撰族譜序曰周官小史奠繫世辨昭穆譜牒淵源有自
來矣兩漢以還益重民族如史遷三代世表王符氏姓諸篇著書立論
亦必下求譜學魏晉六朝族望漸崇學士大夫輒推太史公世家遺意
自爲家傳其命名之別若王肅家傳虞覽家記范汪世傳明燦世錄陸
煦家史等類竝列爲專書況其奠繫世辨昭穆之彰彰者歟唐劉知幾
討論史志謂族譜之書允宜入史然而士庶家乘能入史與否固不可
必至其稱誦先芬闡揚世澤令後世數典不忘者雖史傳何以加諸易
曰天與火同人君子以類族辨物物之大者莫過于人人之本者莫過

于族故曰尊祖故敬宗敬宗故收族族譜之興殆原于此吾族出自南陽盛于炎漢椒衍蔓延不乏顯者然循流溯源不敢以非祖爲祖懼紊也先代由楚入蜀聚族于合之西偏歷久人緜難于指數有覲面不相識者先祖某公乃肇修譜牒統系族屬今代遠年湮汨于兵燹率多散佚故又有再修之議嗟夫自譜牒不掌于官而天下門族之緜不能悉覈於京曹而方志所登又未負得雀失珠此以一譜之微有修之至再而不容已者職是故也方新譜告成爰濡筆述之以期不朽云爾文亦有議論有識解雖非上駟而嘗鼎一臠足知味矣且其行可取正不必以文重也

丁鳳梧投稿
森楷附記